

Ol kampani mas givim Nasfan kontribiuseren long taim stret - Tarutianupela Text Bal sevis bai painimaut

James Kila i raitim

OL WOKMAN-meri husat kampani bilong ol i save putim ol supaenuesin sevis bilong ol i go long Nasfan nau i ken sekim balens bilong ol isi tru taim ol yusim Digicel mobail fon.

Ol lain kastomas i ken presim *627*Nasfan membasip namba na salim SEND. Ol bai wet liklik taim tasol na balens bai kamap long skrin bilong mobail fon bilong ol.

Join Sif Eksekutiv ofisa (CEO) bilong Nasfund, Ian

Tarutia, i bin tokaut long dispela i no long taim i go pinis long Mosbi


Mista Tarutia i tokaut olsem ol i bringim kamap dispela sevis long helpim ol memba long las yia, tasol long dispela ol i muv i go antap moa gen long mekim ol memba bilong Nasfund i ken yusim tasol Digicel mobail fon bilong long rikwes tasol long balens bilong ol.

Mista Tarutia i tok amamas i go long AON long stretim ol rekot na ol rot long sekim ol balens.

Em i tokaut tu olsem ol lain

wokman meri o kontributa i ken yusim dispela nupela sevis long sekim sapos kampani bilong ol i putim kontribiuseren bilong en i go long Nasfan.

Sampela taim ol kontribiuseren bilong ol wokman-meri tasol i save go na kontribiuseren bilong ol kampani i no save go na i save leit. Olsem na dispela sevis em wanpela gutpela rot long sekim olsem ol kampani i mas wokim samting stret na givim tu kontribiuseren bilong ol long helpim Nasfan balens bilong ol wokman meri.



Join Sif Eksekutiv Ofisa bilong Nasfund, Ian Tarutia, i yusim wanpela Digicel fon long soim wei long sekim balens yusim Text Bal. Foto: James Kila

Minista bilong PNG na Australia bung i kamap

TUDE minister bilong Papua Niugini na Australia i holim namba wan kibung long Melbon, Australia long toktok long mani bilong PNG Likuifaid Naturel Ges projek.

Dispela bung i bilong toktok long kamap bilong Sovren Welt Fan we gavman bilong PNG bai kisim long LNG projek.

Gavman bai kisim mani taim em i stat long salim ges long 2013 o 2014.

"Mi tok amamas long wok bung wantaim Gavman bilong Australia long kamapim ol rot bilong lukautim na menesim gut Sovren Welt Fan.

"Gavman i mas redim em yet gut bipo long mani bilong projek

i kamap tru tru long faipela yia i kam," Honorabel Arthur Somare, Minista bilong Pablik Entapraisas i tok.

Long go wantaim em long dispela kibung em Minista bilong Foren Afes Honorabel Sam Abal, Minista bilong Nesenal Plening Honorabel Paul Tiensten, Minista bilong Pablik Sevis Honorabel

Peter O'Neil na Minista bilong Komes na Indastri Honorabel Gabriel Kapris.

Aninit long saining bilong Join Andastending namel long gavman bilong PNG na Australia las yia, PNG i bin askim Australia long kamapim ol rot bilong menesim na lukautim ol mani.

Wantaim dispela Australia i tok long kisim ol intanesenel ikonomis long kamapim ol plen we PNG i ken yusim mani long dispela US\$15 bilion (K45 bilion) PNG LNG Projek.

Wantaim dispela Minista Somare i tok dipatmen bilong em i sapotim ol tingting bilong putim win mani long 16.6 pesen sea bilong Nesenel Gavman long dispela projek i go long kamapim wanpela fan long ovasis long wok bilong stretim o kamapim infrastraksa bilong kantri long bihain taim.

Mani bilong dispela fan bai go aninit long fiskol polisi na baset fremwok bilong yusim mani na dispela bai wantaim long Midium Tem Developmen Plen, Developmen Strateji Plen na bilong Visen 2050.

"Dispela plen i go wantaim long tingting bilong Praim Minista long kamapim tripela Sovrien Welt Fan em Stebelaisin Fan, Infrastraksa Fan na Fiutsa Fan.

"Em i tok sea bilong gavman long PNG LNG Projek we Kroton 2 i holim bai ol i yusim long kamapim infrastraksa bilong bihain taim.

Long taim DSE i tok long kamapim wanpela bodi o Bod bilong ol Gadiens long kamap long wankain taim i laik dispela tripela wan wan fan i mas stap longwe long narapela narapela.

SAINTOLOJI VOLUNTIA MINISTAS

Saintoloji Voluntia Ministas Saut Pasifik Gudwil Tua i kamap pinis long PNG.


"Kam long FRI eksibisen na trening serfta bilong mipela. **OLGETA I WELKAM!**"

"Em i save op long 8.30am i go inap 8.30pm i go inap long mun Julai 5, taim Klosing Seremoni na Graduesen bai kamap. Husat ol lain i pinisim ol woksop bai kisim setifiket. Kam na mipela bai kamapim wanpela trening skediul bilong yu yet we bai bihainim taim yu gat na wanem ol subjek yu laik kisim trening long en."

"Kam long **yelo tent** bilong Scientology long PNG Difens Fos - Murray Barracks (klostu long spot fil i go olsem long Hohola)."


Long kisim moa infomesin, ringim Mathew Andrews long 73455547/76096951

E-mail: pacific@volunteerministers.org Web: www.volunteerministers.org



SAMTING HEV KAMAP LONG STRETIM

Ol samting long toktok em: ansa long drag, Kamapim Gut komunikesin, Wanem gutpela rot long stretim Hevi, Stadi long ol hevi na ol narapela moa ...



Wantok TOK SORI



i go long famili bilong Bruce Flynn long dai bilong Papa, Brata, na Tumbuna

Bruce Flynn

Leit Bruce Flynn em i wanpela Bod Memba bilong Wod Pablisling Kampani long Ogas, 1986 i go inap Mei, 2002.

Long taim em i bin stap olsem Bod memba, Bruce i bin helpim kampani kamapim planti gutpela samting long menesmen level na fainens sait.

Ol Menesmen na Wokmanmeri bilong Wod Pablisling na Wantok Niuspepa bai misim tru Bruce Flynn long hatwok bilong em long taim em i bin stap olsem Bod memba.

Papa God i ken Givim yu Gutpela Malolo

Ona Keto Pipols Faundesin winim Intanesenel Eneji Awot

James Kila raitim

WANPELA non-gavman ogenais-esin (NGO) long PNG, Partners With Melanesians wantaim lokal NGO em i wok klostu wantaim Ona Keto Pipols Faundesin i kisim bikpela luksave tru taim wampela projek bilong ol i winim Nesinol Eneji Glob Awot.

Bikpela Intanesinol Eneji Glob Juri i makim Ona Keto Komyuniti Reforestesin Projek insait long Watabung eria long Dauilo distrik long Isten Hailans provins long winim dispela awot bilong yia 2009. Na ol bai kisim awot long yia 2010.

Eksekutiv Dairekta bilong PwM, Kenn Mondiai i bin kisim toksave long go long kisim dispela intanesinol Eneji Awot setifiket long Eneji Glob Nesinol seremoni long Kigali, biktaun bilong kantri Rwanda long Afrika.

Ol bikman na savemen husat save glasim na luksave long wok bilong bus, graun na wara bilong Yunaited Nesins olsem UNEP na gavman bilong Rwanda i bin amamas tru long tokaut na redi long givim awot i go dispela projek long PNG.

Mista Mondiai i toksave long Wantok Niuspepa olsem awot ya em inap long givim em long stat long mun Jun, tasol em i bin go long kantri Jemani long bikpela miting bilong Klaimet Senis na i no bin

go kisim. Tasol ol lain long UNEP bai salim awot i kam na ating bikpela selebresin na singsing na taim bilong kaikai pik bai kamap long Ona Keto hauslain.

Dispela projek bilong Ona Keto em ol i kolim baiodaivesiti konsevesin na rifestesin projek projek. Projek ya i bin stat long 2003 bihainim tingting bilong Mista Mondiai long helpim ol lain pipel bilong Ona Kipiyufa klen. Bikpela as-tingting blong projek ya em long planim ol yangpela diwai bikos ol pipel long komyuniti i luksave olsem planti ol diwai na bus long eria bilong ol i kamap kunai gras tasol na dispela i kamapim poret tru taim bikpela ren i kam na graun i ken bruk na kamapim birua.

Bihain long sampela taim narapela klen o haus-lain we i stap klostu ol i kolim ol yet olsem Keto i luksave olsem ol tu i gat wankain hevi na na i Join, na ol i kamapim Ona Keto Pipols Faundesin Inc.

Wantaim helpim bilong PwM, Ona Keto Pipols Faundesin i bin kisim halivim i kam long IUCN Netherlands Ekosistem Grent (IUCN NL ECP) long mun Julai 2009 na ol gohet long mekim ol wok progrem bilong ol wantaim PwM progrem menesa Rufus Mahuru.


Dispela fainensol sapot bilong IUCN NL ECP i bin karimaut planti gutpela wok long ples we i lukim

kamap bilong ketsmen risev eria, rifestesin (planti ol nupela diwai long kamapim bus gen) givim trening long ol pipel long wok bilong lukautim bus, graun na wara na tu helpim ol long gutpela tingting long lukautim sindaun na stap bilong ol long bihain taim.

Sampela ol narapela bikpela wok kamap em taim ol i sainim wampela agrimen (MOU) wantaim PwM na OKPF long mun Ogas 2009 long lonsim projek, kamapim 10-pela viles rifestesin komiti long mun Septemba 2009 na kamapim wampela bikpela neseri long groim ol yangpela diwai. Nau yet tu 10-pela viles i gat neseri bilong wantaim yangpela diwai i stap long ples.

Narapela gutpela samting i kamap tu i lukim 30 man, meri na ol yut i stap insait long wampela edukesin aweanes na i mekim lukluk raun i go long ol arapela provins long lukim ol rifestesin projek.

Nau yet moa long 30,000 ol diwai ol i planim na bringim gutpela win na tu bringim bek ol pisin na ol samting bilong bus i kambek gen long ples we pastaim kunai gras i gro. Sampela ol kaikai olsem ol wail frut na tu masrum i gro gen na ol manmeri i amamas tru long kisim na kaikai.



LUKAUTIM BUS: Wampela memba bilong Ona Keto Pipols Faundesin poin i go long ol nupela bus i gro nais tru long sait bilong maunten long Kenangi long Watabung LLG.

Skul em bikpela samting

PASIN bilong lainim pikinini long kisim save bilong rit na rait, pasin bilong ol yet olsem ol sumatin, papa mama, tisa na ol skul bot i no moa stap long olgeta skuls insait long kantri.

Ol dispela samting em Joe Solulu, Sinia Profesenol Advaisa bilong Morobe Edukesen i putim kamaut ples klia bihain long opim nupela Kemeng Praimeri Skul,

long Bambok long Nabak LLG long Nawaeb Ilektoet.

"Ol stekolda mas save long wanem samting em human developmen risos bilong kantri," em i tok.

Em i mekim ol dispela toktok bihain long opening bilong tupela nupela dabol klasrum Kemeng Praimeri Skul we Nawaeb Join Distrik Praioriti na Baset Praioriti

Komiti i putim mani long wokim long las wik Sarere.

Solulu, husat i gat 36 yia long tisa sevis i tok ol skul na ol papa mama bilong ol sumatin mas kamapim ol bot we ol mas save long edukesen na mas helpim ol tisa long kamapim gutpela save long ol pikinini.

Em i tok aninit long UNESCO sata (charter), ol pikinini igat 67 raits. Aninit long dispela gutpela haus bilong slip (shelter), klos bilong werim na gutpela kaikai olsem tripela taim long wampela dei.

"Sapos ol papa mama i no bihainim na i no bihainim wampela bilong ol dispela sata, ol pikinini ken kisim ol papa mama bilong ol i go long kot.

"Olsem na em i wok bilong ol papa mama long kisim ol pikinini i go long ol gutpela skul we ol i mas i gat gutpela tisa, husait i save long wok bilong ol olsem ol gutpela tisa we bai lainim ol long gutpela skul," em i tok.

Long wankain taim, Morobe Gavana Luther Wenge i tok skul em wampela bikpela samting we olgeta pikinini mas i go long skul, kisim save na bihain go bek na mekim wok long sevim ol pipel bilong ol yet.

- **Bustin Anzu i raitim**

Pait long Wewak Setelmen

Bustin Anzu i raitim

TUPELA setelmen long Wewak insait long Is Sepik Provins i pait long las wiken tasol polis i go insait na stopim dispela birua we inap long kamap bikpela olgeta.

Eking Provinsel Polis Komanda (PPC) Inspekta John Yasimani i tok dispela birua i bin kamap long las wik Fraide na i go moa yet long Sarere namel long Saksak na Nuigo setelmen.

"Mipela i kisim ol lidaman bilong tupela sait wantaim na toktok ol long wiken na daunim dispela bel hevi bilong tupela samting. Sapos nogat, planti hevi inap long kamap long dispela taim," em i tok.

Yasimani i tok dispela hevi i bin kamap long Fraide apinun we wampela yangpela mangi i bin tromoi ston na wampela yangpela meri

Saksak Setelmen i bin kisim bagarap na blut i kapsait. Dispela meri i kisim blut na go long ol lain bilong em. Ol lain bilong em i lukim dispela blut na painim dispela mangi na paitim em.

PPC i tok sampela narapela man i bin kam long holim pait tasol ol bung pait long em na katim han bilong em.

Ol lain bilong em long Nuigo setelmen i lukim dispela na i no wanbel na go kukim 5-pela haus bilong ol Saksak setelmen.

Em i tok polis i wok long wiken na daunim dispela hevi we tupela wantaim i amamas wantaim long stretim ol dispela hevi namel long ol yet. I no gat sampela trabelman i stap long polis sel nau yet.

Long narapela nius, ol polis bilong Wewak i sanap sambai long Ambunti.

Yasimani i tok wan-

pela kalabus man Iso Kuwaru bilong Prukenawi long Ambunti i bin ronowe na i dai long han bilong sampela lain bilong wampela man we dispela kalabus man i bin kilim em pastaim.

Dispela kalabus man i go aut na mekim sampela toktok o pasin i no stret long Ambunti stesin. Ol lain bilong dispela dai man i kisim bus naip na brukim het bilong em na em i dai bihain long haus sik.

Em i tok i gat stori olsem ol lain bilong dispela man i dai laik kamapim sampela hevi taim bodi bilong Kuwaru em ol i kisim i go bek long ples bihain long stap long Wewak mog.

Em i tok em i salim sampela lain bilong em i go long Ambunti na kamapim sikuriti long Ambunti na i noken kamapim sampela hevi gen o bihain taim.



PULAP NA KAPSAIT: Ol opsait bilong PMV Bas i save wok mani bilong ol tu. Wok bilong ol i no bilong sindaun opsait tasol na kisim mani bilong pasindia. Taim wok bilong karim pasindia i pinis long 7 kilok nait, ol save go long sevis stesen na brukim baksait long kaunim mani bilong baim bensin gen. **Poto na Stori: Nicky Bernard**

Singaut long pe bilong ol tisa i go antap

PRAIS bilong ol samting long ol stua na maket i go antap na ol bikpela projek olsem Lik-wifaid Naturel Ges (LNG) na ol narapela moa i kamap long kantri, planti woklain long dispela kantri bai laik kisim wok long ol kain kampani olsem we pe i gutpela.

Ol ripot i kamap olsem moa long 100 skul tisa bilong Sauten Hailans i laik risain long go wok long LNG projek.

Dispela bai kamapim hevi long

ol skul na lainim bilong ol pikinini husat bai mekim wok long developim kantri long ol taim i kam.

Bihainim ol dispela ripot, PNG Tisas Asosiesen (PNGTA) i singaut long gavman bilong apim pe i go antap bilong ol tisa long kantri long 20 % mak. Na tu, givim ol gutpela alauwens i go long ol.

Long las wik Fraide, PNGTA i bin givim wanpela polisi sab-misen o ripot wantaim ol 2010 kleim i go long Tising Sevisis

Komisin (TSC) bilong lukim na mekim samting long ol.

Presiden bilong PNGTA, Tommy Hecko na Jenerel Sekreteri Ugwalubu Moana long wanpela stetmen o toktok ol i mekim long dispela wik i tok yunien i bilip olsem gavman i no go hetim planti ol rekomendesen bilong 1999 o ol samting we em bin tok promis i go long ol tisa long mekim i kamap.

Tupela i tok em i taim nau long gavman aninit long TSC i givim

luksave long ol tisa long bikpela wok ol i mekim.

Ol i tok bihainim ol nupela edukesen rifom i wok long kamap na moa yet, ol eria olsem Autkam Beis Edukesen (OBE), Skul Lening Impruvmen (SLIP) na Yunivesel Besik Edukesen (UBE), ol tisa i mekim planti moa wok na gavman i mas givim ol luksave.

Ol i tok aninit long ol rifom ya, ol tisa i mekim moa wok bikos stat yet long yia 2000, moa pikinini i go long skul, moa

sumatin i stap bek long skul, moa ol nupela rifom na-insait long 10-pela yia nau, ol nupela salens i mekim ol tisa i gat ol nupela save.

Salens long skul kurikulum bikos long ol rifom, ol tisa i go bek skul long kamapim gut kwalifikesen bihainim

PNGTA i mekim singaut tu i go long nesanel gavman bilong peim ol tisa spesel alauwens long stopim ol i lusim wok bilong ol na joinim LNG projek long wanem pe i gutpela moa long hap.

PNGPCL bung wantaim ol yut ambaseda

Timon Henry i raitim

PNG Pots Koporesen Kampani wantaim ol kampani mehesa na ol woklain long las wik Sarere i bin bungim moa long 100 volantia na ol yut ambaseda, husat i bin aplai long dispela wok long mun i go pinis.

Wanpela as bilong dispela bung em long luksave long wanpela narapela na kisim moa tingting bilong dispela program. Dispela program bai mekim sam-

pela senis insait long PNGPCL long go pas long dispela program we ol i bin lonsim long April.

PNGPCL Sif Eksektiv Opisa Brian Riches, i bin autim bikpela amamas i go long olgeta volantia, ol yut ambaseda long go kamap long dispela bung long luk save long ol wan wan. Em i tokim ol tu ol na yupela ol yut bai go pas long dispela program.

Mista Riches i tok ol Volantia Yut Ambaseda program em i wanpela volanteri wok we PNG-

PCL i bin kamapim long helpim kampani taim ol krus sip i kam kamap long Mosbi Pot.

Em i tok PNGPCL i gat wok long ol 16-pela Pot insait long kantri na sevis bai surik i go long ol narapela Pots na tu long promotim maritaim turis.

Mista Riches i mekim dispela tok long ol aplikens olsem ol i mas amamas long wanem Papua Niugini i gat kainkain kalsa wantaim 850 kainkain tok ples, na tu

long ol tumbuna bilas bilong singsing, ol atifeks, mauten, ol trek o ol liklik rot na planti moa we ol bai go pas long soim ol.

PNGPCL maketing na humen risos bai makim ol tim lida i go pas long ol liklik grup long redim ol yet long trening bilong ol volantia klostu taim tasol.

Wantok nius tu i bin stap insait long dispela bung i lukim olsem ol PNGPCL i kamapim gutpela as

tingting i kam insait bai daunim pasin nogut we ol i save mekim nabaut long ol turis o narapela visita long PNG.

Wanpela yut bilong Rigo insait long Sentrel Provins i tok long hap bilong en, nogat turis i save go long en tasol em bai traim long kisim ol i go na soim sampela hap eria we ol (turis) i laikim long en, Na sapos ol i laik na dispela kain volantia yut ambaseda we PNGPCL i kamapim i gutpela bilong dispela kantri.

Buy 4WDs - trucks - buses - sedans from Japan

Tel: +81-52-219-9024 / Fax: +81-52-219-9025

www.JapaneseVehicles.com

GO



SN 115924
MITSUBISHI CANTER, '00
5.2ltr diesel, MT, white, High Deck, 3.5 Tons, 129,000km

Questions? No internet? NO PROBLEM! Contact us from 8:00 to 23:00, PNG time:

Tel +81-52-219-9024 / Fax +81-52-219-9025

Email: sales@japanesevehicles.com

Leave us your telephone number and we will call you back!



SN 115577
MAZDA TITAN, '90
3.0ltr diesel, MT, white, 2 Tons, 132,000km.



SN 115422
NISSAN CIVILIAN, '94
4.2ltr diesel, MT, beige/white, 22 Seats, 117,000km.



SN 114659
TOYOTA RAV4, '97
2.0ltr petrol, MT, 4WD, whitepearl/grey, 97,000km.



SN 116610
TOYOTA MARK II-CHASER, '99
2.5ltr petrol, AT, whitepearl, 65,000km.



SN 116666
TOYOTA CAMRY, '98
1.8ltr petrol, AT, whitepearl/silver, 31,000km.



SN 116021
MAZDA BONGO, '98
2.2ltr diesel, manual, white, 0.85 Tons, 126,000km.



SN 103778
TOYOTA HILUX SURE, '97
3.0ltr diesel, AT, 4WD, whitepearl, 101,000km.



SN 116546
MAZDA PROCEED, '97
2.6ltr petrol, MT, 4WD, red, 0.5 Tons, 111,000km.



SN 103932
NISSAN CEFIRO, '99
2.0ltr petrol, AT, silver, 58,000km.



SN 116792
NISSAN SUNNY, '99
1.5ltr petrol, AT, silver, 87,000km.

Contact us:

Web: www.JapaneseVehicles.com
Email: sales@japanesevehicles.com
Tel: +81-52-219-9024
Fax: +81-52-219-9025

Vehicle prices in PNG Kina. Shipping cost and custom duties are not included

SPARE PARTS SERVICE

We can source any vehicle part for you!
Genuine Spare Parts directly from Japan
Email: parts@japanesevehicles.com
Tel: +81-52-219-9358

Wei Bilong Baim Kar Ikam Long Japan

1. Makim kar bilong yu. Sekim web-sait bilong mipela o askim wanpela sels edvaisa bilong mipela



2. Askim tasol long wanpela fri kwotesin. Ringim mipela long telefon, fex o e-meil.



3. Pinisim peimen. Peim long US Dola igo long benk akaunt bilong mipela.



4. Bai mipela salim kar bilong yu long sip Gutpela rot long salim long sip na save kam hariap tru.



5. Yu kisim kar bilong yu. Peim takis, rejistarim kar ya na yu redi long draivim.



Gavman i stap bilong sevim pipel o em i wanpela namel man bilong foren investa

Gavman i stap bilong sevim pipel o em i wanpela namel man bilong foren investa long ol maining na petroleum projek?


PASIN gavman i mekim long senisim Envaironmen Ekt 2000 long raunim disisen bilong Nesenel Kot long Madang sampela mun i go pinis, em i kamap bihainim asua bilong gavman we ol i nogat wanpela klia investmen polisi long ol bikpela risos developmen long dispela kantri.

Moa yet, ol politisen bilong yumi i nogat klia luksave long wok bilong ol olsem wanpela gavman insait long ol bikpela maining na petroleum developmen projek i kamap insait long kantri.

Ol i abrus pinis long bekim wanpela askim, olsem: 'Olsem wanpela gavman, ol em ol reguleta bilong lukautim sindaun bilong pablik, o ol i kamap ol ejen bilong ol praivet foren investa?'

Namba wan bikpela wok bilong gavman em long mekim ol gutpela lo bilong kamapim gutpela sindaun bilong pipel bilong en.

Na aninit long lo, namba wan rot gavman i ken kisim winmani em long ol takis em i kisim bihainim ol takis lo bilong en. Wantaim dispela ol winmani i kam long takis, gavman i mas givim ol besik sevis olsem helt kea, edukesen na ples bilong givim trening, pablik trenspot, na kamapim gutpela sindaun



we i orait long mekim wok bisnis na ekonomik wok-about bilong kantri. Em i no planti wok, na mak bilong winmani gavman i ken kisim em i winim dispela ol wok.

Long wanpela kantri olsem PNG, we bikpela hap namba bilong ol manmeri em ol lain i stap long ol ples, ol wanpisin, na tumbuna husat i sindaun long graun, i mas i gat ol spesol polisi i stap long redim gut pipel long lusim tumbuna sindaun na kamap long sindaun bilong tude. Long toktok bilong tude, dispela em i wankain olsem long tok inglis, ol i save tok, "empowerment through capacity building", o strongim manmeri wantaim save bilong mekim samting.

Mipela em ol pipel bilong long taim, lukluk bilong yumi yet we i narakain long ol arapela. Dispela luksave i karamapim spirit wol na wol yumi ken holim na lukim i stap. Olsem tasol, yumi save holim strong skul bilong ol tumbuna insait long olgeta hauslain, na em i wanpela wol tasol i karamapim yumi olgeta/

Olsem na ples yumi sindaun long en em i bikpela

samting long yumi yet olsem man na sapos ples yumi sindaun long en i bagarap long kisim moa mani, na samting bilong graun, yumi, olsem wanpela pipel bai bagarap wantaim.

Bikos gavman i nogat klia nesenel polisi long maining na petroleum developmen, em i no inap long givim gutpela tingting long taim bilong sainim o kamapim ol kain kain Projek Agrimen we bai mas go long kisim tok orait na luksave bilong gavman. Gavman i nogat wanpela mak bilong makim bai em i ken givim tok orait, o skelim gut ol gutpela na nogut bilong ol bikpela projek developmen sabmisin. Dispela i wankain olsem taim yu draivim kar long wanpela nupela ples, nay u nogat piksa bilong soim ol rot bilong dispela nupela ples yu stap long en.

Mipela i pasim ai na guria long kisim mani long ol praivet foren investa, na yumi lusim pinis stretpela tingting na pasin olsem wanpela gavman bilong wanpela indipenden kantri. Em nau, yumi paulim pinis wok bilong yumi olsem wanpela gavman bilong pipel, i kamap long laik bilong pipel, na i wok bilong lukautim pipel, aninit long wanpela mama lo ol i raitim na stap.

Taim yumi stap insait long dispela paul tingting olsem, ol gavman i stap i kam inap nau i wok long lukim ol bikpela petroleum

na developmen projek olsem 'rot bilong kisim mani' na i no rot bilong kamapim gutpela developmen. Em i olsem yumi wokabout i go insait long bik bus, na yumi no luksave long ol diwai i stap laip na i gro. Nogat. Yumi lukim tasol ol diwai i dai pinis na i silip i stap long somil bilong salim i go long Malesia.

Dispela gavman tasol i kalap i go sindaun antap pinis long baksait bilong ol foren investa, na nau yumi lukim tupela wok ya em wok bilong gavman long makim na lukautim pipel na wok bilong gavman i bihainim laik bilong mekim mani bilong em yet.

Bikos i nogat wanpela klia, strongpela nesenel polisi long maining na petroleum developmen, em i isi long gavman i pundaun na kamap poroman bilong ol foren investa bikos long sait bilong ol investa, ol i no inap long painim wanpela gavman we i kamap wanpela gutpela bisnis patna we ol i ken givim mani long laik na no inap wari long wanpela banis i stap long pasim ol.

Nau gavman bilong dispela indipenden kantri i sindaun poromanim ol, ol i pasim rop long nek bilong en, na nau foren investa i ken yusim ol pawa bilong gavman na ol pablik risos em i gat long stretim gut rot bilong ol, na yusim ol takis pawa bilong gavman long kisim ol traipela takis malolo tru.

Na sapos i gat sampela belhevi i kam long pipel, em nau investa i ken tokim nesenel gavman long salim nesenel polisi fos i go. Sapos em i no nap, Difens Fos i stap long go na pasim maus bilong ol manmeri.

Na nau nesenel gavman i kamap ejen o bisnis patna bilong praivet foren investa, mipela i nogat wanpela pablik atoriti i stap we i gat gutpela tingting long mekim wok bilong gavman na banisim gut pipel, busgraun bilong ol, na laipstail bilong ol.

Mobeta wok bilong wanpela bisnis patna wantaim wanpela foren investa em long tok nogat long holim hap sea bilong ol projek, na bai yumi ken holim strong wok bilong yumi olsem gavman bilong wanpela indipenden kantri we i holim pawa bilong makim na kisim takis bai yumi ken strongim foren karensi eksens bilong yumi na was long mani i kam na go aut long kantri. Bai yumi noken lus long sampela hap winmani yumi mas kisim.


Yumi mas tok strong tu olsem olgeta winmani i kam long ol risos bilong yumi i mas kam bek insait long kantri olsem foren kanrensi na i noken go sindaun ausait long kantri.

I gat planti moa samting gavman i mas wokim, na em i no wokim.

Tasol nogat. Nau yumi tingting long dinau mani long baim ekwiti, olsem na yumi mekim indipenden kantri bilong yumi

kamap wanpela rot bilong kirapim praivet foren investmen, o mekim wok olsem wanpela liklik bisnis patna i mekim wok long dinau mani.

Dispela gavman i abrus pinis long strongim pipel we em i mas banisim; em i bagarapim pablik wok bilong en olsem em i mas mekim ol lo, na em i lusim pinis bilip bilong em olsem wanpela eksekutiv gavman bilong wanpela indipenden kantri; em i brukim pinis bilip bilong pipel, na em i yusim ol pawa bilong em long mekim lo long senisim ol gutpela lo wantaim ol nogut lo; em i daunim strong bilong em long mekim ol takis lo, na givim ol bikpela takis malolo, na dispela i daunim ol bisnis i stap pinis; na i abrusim foren karensi wok bilong en, long larim winmani i go aut long kantri; na nau, em i no mekim wok bilong gavman tru, em i wokbung wantaim ol foren investa na bagarapim indipendens bilong en we nau em i no inap long yusim pawa bilong em long sanapim gutpela gavman; na i brukim lo taim em i salim ol memba bilong Royal Papua Niugini Konstabulari long banisim ol hap bisnis bilong em yet na daunim ol pipel bilong Papua Niugini; em i brukim Lidasip Koud long banisim ol sindaun na bisnis bilong ol politisen; na moa yet, dispela gavman i no strongim bilip, na toktok, na tingting bilong Nesenel Konstitusen o Mama Lo.



Putim was long 40 Yias Anivesari bilong Wantok Niuspepa! Spesol Saplimen i kam klostu long dispela pepa bilong yumi ol PNG stret!



Is this government a public regulator or a private agent for a foreign investor in mining and petroleum projects?


THIS government's recent move to amend the Environmental Act 2000 to outwit the decision of the National Court sitting at Madang some months ago, is the outcome of our successive government's lack of a well-defined and concise investment policy on major resources development in this country.

In particular, our politicians do not have a clear view of their role as a government in major mining and petroleum development projects undertaken in the country.

They have failed to answer one basic question, namely: 'As a government, are they regulators for the public benefit, or are they agents for the private foreign investor?'

The primary function of any government is to make good laws for the well being of its people. And under the law, the major source of the government's revenue is the collection of taxes by exercising its taxation powers. With the moneys thus collected, the government of the day must provide certain basic services like health care, education and training facilities, public transport and generally, provide a setting conducive to commerce and industry and a sense of order in the social and economic life of the country. It is not such a long list compared with the funds that we can access as a government.

And in a country like PNG, where the population base are the indigenous societies characterized by villages, clans and tribal orders which are primarily land-based and rural, special policies must be formulated and



Sabina's Corner

implemented to ensure an orderly transition from the traditional setting to the modern setting. In modern day jargon, this is akin to community empowerment through capacity building.

We are an ancient people with our own world view of life, encompassing both the spirit world and the physical world. In effect, we uphold the view passed down by our ancestors from generation to generation that there is really only one world encompassing both the spirit and the physical, not unlike man, who is both spirit and matter combined.

Therefore, the physical environment being our habitat is very much part and parcel of our inner being as a people so where our physical environment is ruined in the name of money and material wealth, we are also ruined as a people.

Because the government does not have a clear national policy on mining and petroleum development, it is unable to make any value judgment when faced with various Project Agreements submitted for consideration and approval by the government. The government does not have the necessary yardstick by which to assess the pros and cons of any major project development submissions. This is akin to driving in a foreign

city without a road map for that particular city.

In our blind zeal to access private foreign investor funds, we stooped so low that we lost our integrity as a government of a sovereign State and accordingly, confused our role as a government of the people, by the people, and for the people, under a written constitution.

Whilst in that state of confusion, our successive governments have viewed any proposals for major mining and petroleum development projects as "ready cash" and not mere proposals for possible development. It is like walking into a jungle and not recognizing the organic trees, full and vibrant with life, but seeing only the inorganic logs heaped in a log yard waiting to be shipped to Malaysia.

Unfortunately, this government in particular has jumped on the bandwagon of the foreign investor so that there is now a merger of functions between the government's public role vis-a-vis the citizens on the one hand and the government's pursuit of its ill-defined economic interest on the other hand. In effect, what has really happened, is that without a clear, crisp and concise national policy on mining and petroleum development, it was easy for the government to be enticed, lured or seduced into partnership with foreign investors because from the investors' point of view, they could not have hoped for a better business partner than the national government of a country where they will pour in their money.

With the government of a sovereign State securely on board their bandwagon with a dog collar

around its neck (or is it an Irish Dog Collar), the foreign investor can then tap in on the government's law making powers and public resources to ensure a smooth ride for their capital and at the same time, exploit the government's taxation powers by getting away with hefty tax concessions. And if there is any opposition by the people on the land, then the investor can force the national government to deploy the national police force and if that fails, then there is the defence force to move in to keep the people at bay. And given that the national government has opted to become an agent for or a business partner with the private foreign investor, we are left without a public authority with any integrity to perform the public function of a government to protect the people, their habitats and their way of life.

By far, the better option to being a business partner with a foreign investor is to decline the offer to take up equity in the projects, in order to maintain our status as a government of a sovereign state with the necessary authority to impose and collect taxes in various forms and to revamp our foreign currency exchange regime to oversee the flow of capital in and out of the country to ensure that we do not miss out on any financial benefits due to us. We must also insist that all revenue generated from the sale of our resources must be brought back into the country as foreign currency and not be parked anywhere outside the country and the list is endless.

However, we opted to borrow money to buy equity and thus, relegated our sovereign state to the lowly position of a facilitator for private foreign investment, or alternatively, being foolishly content to play the role of an insignificant business partner with borrowed capital.

This government has failed the people it is bound to protect; compromised its public role as a law maker, and lost its integrity as an executive government of a sovereign state; further violated the sacred trust and abused its law-making powers with impunity by replacing good laws with bad ones; improperly curbed its own taxation powers by conceding hefty tax exemptions and that way, discriminating unfairly against existing businesses; overlooked its own foreign currency regime to allow a free flow of capital out of the country; improperly deprived itself of or unduly stopped from exercising the public function of government, having connived and colluded with foreign investors or compromised itself so as not to exercise its constitutional powers of good governance; abused its legal authority by deploying members of the 'Royal Papua New Guinea Constabulary' to protect its ill-defined business interests against the interests of its people; violated the Leadership Code to protect the politician's personal and political interests; and in particular, this government has failed to uphold both the letter and the spirit of the National Constitution.

Putim was long

40 Yias Anivesari


bilang Wantok Niuspepa

Spesol Saplimen

i kam klostu long dispela pepa bilong yumi ol PNG stret!

WANTOK
Niuspepa 1970-2010





DAIHATSU

WOK I LAIKIM TRAK BILONG WOKIM MOA WOK



**OL I REDI
LONG GOAUT
TASOL**

- PRAIS
- STAP LONG TAIM
- WOKIM MOA WOK

SPESELS

K79,000*

***KAGO**

Model: V116 - 3.6 tan

K82,500*

***DAMP**

Model: V118 - 2.5 tan

Ela Motors



HARIAP NOGUT BAI STOK PINIS!

Badill..... Ph 3229400	Mt. Hagen.. Ph 5421888	Wewak... Ph 4562255
Waigeni..... Ph 3257388	Kimbe..... Ph 9835155	Vanimo... Ph 4571254
Lae..... Ph 4781800	Lihir..... Ph 9864099	Tabubil... Ph 6499060
Kokopo..... Ph 9829100	Buka..... Ph 9739915	Porgera.. Ph 5479367
Madang..... Ph 4222188	Goroka..... Ph 5321844	Alotau.... Ph 6410100
	Kavieng..... Ph 9842788	



Your First Choice

*Kondisins istap . Spesel bai pinis long : 31/07/2010 or While Stock Last . www.elamotors.com.pg

Operesen Open Hat program i stat pinis

... Ol dokta bilong Australia bai kamap tumora

OPERESEN Open Hat (OOH) program i stat long dispela wik Mande long Pot Mosbi Jenerel Haus sik wantaim ol nesenel dokta i karimaut "closed heart" operesen long ol sampela lain i gat sik long lewa o hat.

Ol volantia dokta bilong Australia bai kamap long PNG tumora Fraide long wok wantaim ol pren dokta bilong ol long PNG na sevim laip bilong samting olsem 50 pipel we bikpela mak em ol pikinini, long "open na closed" hat operesen.

OOH i bin stat long yia 1993 na i kam inap nau, em i helpim 647 pipel i gat sik long lewa.

Long dispela, bikpela mak olsem 75 pesen em ol pikinini.

Ol bai wokim "closed" hat operesen long 22 siklain i kam long olgeta hap bilong kantri. Insait long wanpela de, ol dokta i wokim 5-pela operesen. Insait long 17 yia ol dokta na nes bilong Australia i wok long kam karimaut OOH, ol i givim trening tu long ol speselis PNG dokta na nes long dispela eria. Olsem nau i gat samting olsem 6-pela PNG dokta na wankain namba nes i save long karimaut dispel wok. Ol PNG dokta na nes i save gut pinis long karimaut "closed" hat operesen we ol i wokim taim lewa i wok yet.

"Open" hat operesen em ol i wokim taim ol dokta i stopim hat long i wok.

Dokta bilong sik long lewa em Dokta Noah Tapaua na Dokta Lister Lunn i go pas long narapela 4-pela dokta i wok wantaim ol long karimaut OOH operesen.

Ol Fan resing long karimaut OOH i kisim ol tok promis pinis long kisim K750,000 taim nesenel gavman i promis long helpim wantaim K200,000.


Inap long aste apinun, ol dokta bilong PNG yet i wokim operesen pinis long 5-pela pikinini i gat namel long 8-pela mun na 12-pela kris, as.

Ol lain i werim operesen na ol dispela i kisim operesen em ol i stap long Wod 7 taim ol dispela we ol dokta bilong Australia i kam na operetim ol bai i slip long Intensiv Kea Yunit (ICU)wod.

Nau ol PNG dokta na nes i ken karimaut gut wok ol yet wantaim nogat prèt olsem pastaim. Dispela em long "closed" hat operesen tasol.

Ol dokta na nes bilong Australia i save painim taim bilong ol yet na baim balus tiket bilong ol yet bikos ol i gat bikpela laik long helpim ol pikinini long PNG i bungim hevi long lewa bilong ol.

YUMI na HIV
WANTAIM
Fr Jude Ronayne
Forde OFM



Esia na PNG

Mi bin ritim wanpela Yunited Nesens (UN) ripot ol i bin raitim long mun Epril. Ripot i stori long HIV i go kamap bikpela insait long lain marit-meri long Esia (Asia). Ol i tokaut : Nogut yupela ol marit meri i ting yupela i orait na no ken kisim HIV insait long marit bilong yu. Ol i tok: "The report denies the myth that a seemingly monogamous sexual relationship is safe."

Ripot i tok: Ol meri inap kisim HIV long long marit (man) bilong ol! Na ol i skruim tok i go: I luk olsem 90% long ol meri bilong Esia, i kisim HIV pinis i bin kisim insait long marit bilong ol! Olsem wanem? Ripot i tok: Long Esia 75 milion man i save raun wantaim sex-woka o meri (promiscuity); 4 milion man i save kisim drag long ol sut (drug users), na 16 milion man i save pamuk wantaim arapela man (MSM). Sik HIV i go kamap bikpela bikos planti man i save brukim marit-promis bilong ol na pilai nabaut wantaim pamuk-meri o drag o wantaim narapela man. Man i wokim olsem na planti i kisim sik HIV na bihain go bek na givim HIV long poroman i sindaun na i stap gut long haus. Rong pasin na sin pasin bilong dispela kain ol man i wok long bagarapim ol famili laip insait long Esia!

I wankain long PNG! Planti man i save pilai nabaut, kisim sik HIV, na bihain go bek long haus na givim long meri bilong ol. Tu, PNG i gat wari long man i pilai wantaim man (MSM) o pilai wantaim man na meri wantaim (bisexual). Long drag - yumi no klia yet!

Orait, yumi save long we HIV i wok long go antap bikpela. Nau program bilong banisim na kontrolim HIV i stap we? Nesenel AIDS Kaunsil Sekreteriet (NACS) i wokim plen ol i kolim "PNG National HIV and AIDS Strategy, 2011-2015". Tasol i luk olsem tingting bilong i sot long save, long gutpela rot long bihainim na long hop o tingting bilong kontrolim HIV na lukautim ol AIDS lain.

- Tingting bilong ol i pas long kondom o karamap tasol; tasol man i spak o drag na planti arapela tu i les long yusim kondom; na kondom tu i no 100% seif! Kondom em nupela samting. I no samting bilong PNG, na planti i no bilipim o laikim dispela samting!
- Tasol, ol PNG i save long marit laip na sindaun gut na stret wantaim poroman. We stap toksave (Awareness) long marit laip? We stap tok long sapotim marit laip na lukautim ol marit-meri (protection of housewives)? We stap tokaut i go long tokim ol man long ol i no ken hambak nabaut? Nogat nau! I luk olsem, NACS i nogat bilip long marit laip, long senisim pasin (behaviour change).
- Tu, i nogat gutpela program long kontrolim na lukautim ol man i pren wantaim man (MSM) na long ol seks-woka.

Ol Sios i wok wantaim ol siklain (HIV/AIDS na STI's na jenerel helt) i save pinis long we ol pipel i save kisim HIV. Olsem na, mipela lain bilong ol Sios i raitim pinis sampela tingting bilong go insait long dispela "Strategy Plen". Ol samting mipela i tok long en i wankain Ripot i kam long Asia na mipela i save HIV i kamap long PNG. Tasol NACS i givim baksait pinis long tingting bilong ol Sios.

Ol Esia (Buddist, Hindu, Moslem, Kristen, etc.) i sapotim marit na famili laip na sindaun gut (behaviour change). NACS bilong PNG i pas long kondom!

Sik i kilim dai 15 pipel bilong Manam

FIFTIN (15) pipel bilong Manam Ailan long Madang provins las wiken long wanpela sik ol i no klia tumas long en.

Sampela i tok olsem dispela sik em kolera na planti i no klia gut long en.

Pastaim memba bilong Madang na nau i wanpela bisnis man na papa bilong Madang Risot Hotel Se Peter Barter i bin flai long helikopta bilong em i go long ples Duguluba long lukim na helpim ol siklain. Ol siklain i bin go kisim marasin long Bien na helt senta long Manam Ailan na Bogia helt senta long bikples.

Ripot we wanpela kaunsela long Bogia i givim it ok sain i mak long dispela sik i stat wantaim bodi i kol i stat long lek i go antap. Taim kol inap long bel, hangere i pamim tru man. Na taim dispela bikpela kol i kamap long hat o lewa, man i pundaun long graun na dai kwiktam tasol.

Tenpela (10) man i bin dai long ples, tripela long Bien helt senta na tupelo Bogia Haus sik.

Wanpela grup long Madang Provinsel Gavman i go sekim ol pipel na kain sik ol i kisim long Manam Ailan, tasol ol i no autim yet ripot long dispela.

Ol ripot i tok ol pipel long ples Duguluba i prèt long kain samting i kamap na ol i wok long ronawe i go stap wantaim ol wanpisin bilong ol long bikples Madang.



MOBAIL KLINIK: Toyota Lenkrusa em i mobail klinik, Digicel i Faundesen i bin donetim i go long Foaskwea Kaugere klinik i helpim ol lain long Abau distrik i kisim bagarap long sik kolera. *Poto: Digicel Media.*

Mak long sik kolera long Abau i go daun ... NCD i go antap yet

KAUGERE Foskwe sios Mobail Klinik i helpim klostu 1,000 pipel i bin kisim sik kolera long Abau Distrik insait long Sentrel provins.

Dijisel Faundesen i patna wantaim Kaugere Living Lait Foskwea Sios na helpim givim marasin long 941 pipel we sik kolera i bagarapim ol.

Long stat bilong las mun, sik kolera i kamap na bagarapim ol pipel long Abau Distrik insait long Sentrel provins na sampela i dai pinis long ol Motu Viles na nau Abau. Na Nesenel Kapitel Distrik Kolera Task Fos i bin putim askim i go long Kaugere Living Lait Foskwea Sios long givim helpim bilong ol i go long Abau we sik kolera i kisim nogut pipel bilong sampela ol ples na ol i tok orait long mekim. Ol i yusim Mobaik Klinik em wanpela Toyota lenkrusa ambalens we Dijisel

Faundesen i bin donetim i go long ol long yia 20089. Mobail Klinik i gat ples bilong nasing opisa na tupela Komyuniti Helt woka, ol masin bilong ol dokta i yusim long helpim ol siklain long taim bilong ol imejensi o ol i sik-nogut tru.

Long Abau, ol bin yusim Mobail Klinik ambalens long kisim ol woklain na ol metiriel i go na i kam long Mosbi i go long Abau long tupela wik taim ol woklain bilong Kaugere Foskwe Sios Mobail Klinik i bin beis long Abau. Ol lain i bin sik nogut tru em ol i kisim ol i kam long Mosbi Jenerel Haus sik. Insait long tupela wik long Abau, ol bin rekotim 941 siklain we Foskwe Sios Mobail Klinik woklain i bin helpim ol. Ol i bilong ol ples olsem Waiori, Wanigela, Gavuone na Maopa viles. Grup i bin kam bek long Mosbi las wik Sande Jun 26

taim ol i lukim olsem sik kolera i wok long go daun nau.

Sif Eksekutyutiv OPisa bilong Dijisel Faundesen em Marina van der Viles i amamas olsem Mobail Klinik ol i givim i wok long sevim gut ol pipel i stap, moa yet ol pipel long ples.

Foskwea Sios i ranim tupelo helt klinik. Wanpela i stap long Kaugere na narapela long KilaKila long Mosbi.

Long wankain taim, sik kolera i wok long go antap long Nesenel Kapitel Distrik, maski bikpela skul awenes i wok long go aut.

I kam inap aste apinun, sik kolera i kisim pinis 937 pipel long NCD.

Siaman bilong NCD Kolera Task Fos, Dokta Timothy Pyakalya i tok dispel em bikos pipel i no bihainim gutpela haijin long lukautim gut ol yet na stap klin olgeta taim.

Kalserele De i bilong strongim tumbuna pasin na yumi husat

Veronica Hatutasi i raitim

TUDE, wol i luksave olsem kalsa na tumbuna pasin em ol bikpela samting bikos ol i givim luksave man i husat na we em i kam long en.

PNG i wanpela kantri we wol i lukim olsem tumbuna pasin na kalsa i stap strong yet. PNG yet tu i luksave long dispela tu na Edukesen Dipatmen i strongim ol skul long olgetga hap bilong kantri long mekim ol tumbuna danis, singsing na ol narapela samting bilong kalsa i kamap hap long ol program bilong ol. Dispela i save kamap moa yet taim ol bikpela selebren long skul kalenda i kamap na skul i ken makim husat

kalsa grup long putim kamap ol tumbuna danis na singsing. Mekim na ol wanwan liklik skul, praimer, sekonderi na yunivesiti i save gat ol kalserele de bilong ol wanpela taim insait long wan wan yia.

Pot Mosbi Nesenel Hai Skul (PomNats) long Gerehu insait long Nesenel Kapitek Distrik em i wanpela skul we i save putim bikpela tingting long ol sumatin bilong em i mekim gut long ol



STRONGIM KALSA: I no husat, tasol tripela sumatin bilong Hailans rijen i soim kalsa bilong ol long Kalserele De bilong PomNats las yia.

akademik sabjek, gutpela pasin (discipline) na strongim tumbuna pasin na kalsa.

Tumora Fraide Julai 2 bai lukim PomNats Hai Skul graun i paia taim ol skul sumatin i putim kamap ol kain kain singsing tumbuna, danis na bilas stat long 10 kilok moning inap long 3 kilok apinun. Olgeta yia nau, skul i makim laspela de long pinis bilong Tem namba 2 olsem Kalserele De long selebretim bonde

bilong skul.

Wantok i stori wantaim Prinsipel bilong PomNats, David Diowai, husat i gat ol dispela toktok long Kalserele de bilong Pot Mosbi Nesenel Hai Skul, as tingting na ol narapela toktok long ol samting long skul bilong em.

"I gat tupela as long Kalserele De selebren long PomNats. Namba wan em long selebretim bonde bilong skul i save kamap long Jun 1 olgeta yia. Tasol bikos mipela i

no laik givim hatwok long ol sumatin na ol tisa long namel bilong skul yia, mipela i surikim selebren long pinis bilong Tem namba 2 we ol sumatin na tisa bai go insait long skul malolo bilong ol stat long dispela de.

"Namba tu em long promotim o strongim tumbuna pasin na kalsa long tingting bilong ol yangpela skul pikinini na ol bai ol i save long ol kalsa bilong yumi i gat ol kain naispela kala na kamap ol gutpela

yangpela man na meri. Dispela em i namba 14 yia bilong Kalserele De bilong skul na de i pas pinis long tingting bilong ol sumatin na ol i save redi long em. Ol pikinini i kisim save long akademik sait tasol ol i laikim tu sait bilong kalsa bikos dispela em i mekim ol i painim na save long asples, wanpisin na kantri ol i kam long en," Mista Diowai i tok.

Mista Diowai i tok dispela kalserele de bai bungim wantaim ol kain

kain kalsa bilong 20 provins insait long PNG.

PomNats i bin op long Jun 1, 1996 na em i wanpela gutpela na top skul insait long Nesenel Kapitel Distrik na PNG. Skul i gat gutpela akademik rekot na long las yia, moa long 200 Gret 12 sumatin bilong em i bin kisim spes long ol yunivesiti na ol arapela teseri institusen. 150 i bin kisim skolasip long Opis bilong Haia Edukesen.

Long dispela yia, i gat 669 sumatin. PomNats i no save bungim ol bikpela hevi long ol sumatin bilong em i wokim ol bikhet pasin.

Mista Diowai i tok dispela em bikos skul i gat ol lo we ol sumatin i bihainim na tu, ol tisa i save mekim gut wok bilong ol. Tu, skul i gat gutpela menesmen na bot ov gavanas i save wok hat long lukim olsem ol sumatin i bihainin gutpela pasin na skul i ron gut.

Gavman bilong Japan i bin sanapim skul na ol skul bilding samting na givim i go long han bilong gavman bilong PNG long 1996 na i kam inap nau, em i ron gut wantaim ol gutpela skul bilding we ol i lukautim ol gut i stap.

Faniufa skul opim nupela rum long helpim sik sumatin

James Kila i raitim

WANPELA top-ap praimer skul insait long Goroka taun long Isten Hailans provins i kamap nambawan tru long provins i opim wanpela nupela haus we ol bai lukautim ol sumatin husat i sik na tu, ples we ol sumatin i ken kisim gutpela skul toktok o edvais.

Dispela ol nupela rum ol i kolim long Inglis olsem 'Sick Bay' na em i gutpela developmen tru i kamap aninit long wanpela progrem ol i kolim 'School Learning Improvement Program' o SLIP.

Isten Hailans Provinsal Helt Dairekta, Ben Haili, i bin opim dua long dispela ol nupela rum long Faniufa Sekred Hat Praimeri skul long las wik Tunde long fran long ol manmeri na tu ol pikinini.

Liklik singsing na bilas wan-


taim i bin kamap long amamasim dispela de.

Katolik Bisop bilong Goroka daiosis, Bisop Francesco Sarego i bin stap long lukim dispela seremoni we i kamap long skul graun.

Mista Haili i tok olsem ol dispela rum em i bikpela samting long helpim ol sumatin husat i sik na tu i gat sampela hevi long go stap na kisim helpim.

Em i tokim ol sumatin na tu ol tisa long lukautim dispela samting na tu mekim gutpela yus long en. Na tu, was gut long ol samting long ol narapela sumatin long bihain taim i ken yusim.

Dispela sik-be na rum long givim kaunseling o skul toktok na edvais em i kamap long gutpela tingting bilong Faniufa Sekred Hat praimer skul edministresin yet na i yusim SLIP model long kamapim.



REDI LONG OPIM DUA: Isten Hailans provinsal Helt edvaisa Ben Haili i holim ki na redi long opim dua bilong liklik sik rum taim Bisop bilong Goroka daiosis, Francesco Sarego i lukluk long Faniufa skul long las wik.

Skul wantaim helpim bilong ministresin divisin i stretim gut Isten Hailans Provinsal Helt ed- wanpela haus em pastaim

deputi het-tisa bilong skul i stap long en na tanim dispela haus i kamap olsem sik be o ples we ol sumatin i sik i ken go malolo na tu kisim kaunseling o edvais. Ol i yusim tupela rum long dispela haus long mekim ol dispela.

Wanpela tisa bilong Faniufa Sekred Hat praimer skul i tok olsem ol sumatin husat i pilim sik bai kisim fes-eid pastaim long dispela haus na ol bai lukautim ol pastaim i go na bihain ol i salim ol i go long bikpela Goroka bes haus sik long kisim marasin stret.

Narapela gutpela samting tu em ol tisa na komyuniti na tu lotu sait na wanem ol hevi ol wan wan sumatin i gat.

Mista Haili i bin givim wanpela ol medikel samting olsem ol marasin i go long dispela nupela haus o sik-be long helpim ol tisa long lainim tu sampela gutpela rot long fes-eid na helt.

Bisop Cherubim Dambui i dai

...Gutpela sios wokman na politisen

Veronica Hatutasi i raitim

OKSILERI bisop bilong Pot Mosbi Katolik Asdaiosis, em Bisop Cherubim Dambui, i dai pinis bihain long em i sik long sampela yia.

Em bin gat 62 krismas taim em i dai las wik Fonde long haus sik long Manilla, Filipins we em bin wok long kisim marasin long en.

Bisop Cherubim i bilong ples Timbunke long Angoram, Is Sepik provins. Em i namba wan long 10-pela pikinini bilong papa Henry Nambau na Augusta Tukuai Nambau husat i stap laip yet.

Em i bin wokim praimeri skul bilong em long Angoram na hai skul long Brandi Intenesenel Hai skul long Is Sepik yet pastaim long em i go long Keravat Rijinel Hai Skul long Is Nu Briten provins long 1961 inap long 1966. Bihain long dispela, em i bin gat laik long kamap pater na em i go long skul seminari Sen John's Maina Seminari na Holi Spirit Seminari long Bomana ausait long Mosbi siti.

Long 1974, em i kisim blesing long Bisop Leo Arkfeld SVD na kamap pater.

Tupela yia bihain long Julai 1976, em i bin kamap interim primja bilong Is Sepik provins.

Tripela yia bihain long Oktoba 1979 inap long Oktoba 1983, em

bin holim wok olsem primia bilong Is Sepik.

Bihain em i lusim wok politiks, em i go bek long wok bilong sios long Wewak Daiosis. Long tupela yia stat long 1989 -1990, em bin holim wok olsem rekta o bos bilong Bomana Holi Spirit Seminari. Em bin wok olsem helpim bisop bilong Bisop Ray Kaliz SVD olsem Pastorel Vika na Vika Jenerel taim long 2000, sios i makim em olsem Oksileri bisop bilong Pot Mosbi Asdaiosis. Na em i kam long Mosbi statim wok long stat bilong 2001 inap long em i dai long wik i go-pinis.

Em bin holim sampela bikipela wok long siti taim em i stap olsem Oksileri bisop. Wapela em long Siaman bilong CIS Promosen Bot na narapela em i ol sios olsem wapela Komisina long NCD Bot.

Bisop Cherubim em i wapela gutpela saveman bilong hatwok na i gat daunpasin.

Taim Praim Minista Se Michael Somare i autim tok sori bilong em long dai bilong Bisop Cherubim, em i tok "Bisop em i wapela gutpela wokman bilong God husat i bin sevim gut Katolik Sios na pipel inap em i dai long Jun 24 bihain long sik longpela taim. Mi bin gat gutpela sans long wok wantaim em taim em i bin wok olsem politisen na tu, taim em i wok long sios. Mi gat bikipela luksave long Bisop


Cherubim long sevis em i mekim long Katolik Sios na kantru PNG," Se Michael i tok.

Bisop Rochus Tatamai bilong Bereina Katolik Daiosis i wokim dispela toktok long wanwok bisop bilong em.

"Long mipela ol nesenel bisop, mipela i wari tru taim mipela i lukim wapela sinia nesenel bisop i yangpela yet na i dai. Mipela ol yangpela bisop i save lukluk long en long ekspiriens na ol gutpela save bikos em i man bilong tingting strong na glasim gut ol samting long sios na politiks wantaim. Mipela bai painim em tru long ol bung na konpres bilong mipela long wanem, em i save gat ol planti gutpela tingting na skelim ol samting olsem wapela man Melanesia.

"Bisop Cherubim, tenkyu long gutpela sevis yu bin wokim long piepl bilong PNG long sios na politiks.... Yu trupela pikinini bilong PNG husat i hatwok na kontribuit long divelopmen na luksave bilong ol Kristen Sios," Bisop Rochus i tok.

Mary Helpim bilong ol Kristen Sios long Don Bosko Tau-rama insait long Nesenel Kapitel Distrik i bin pulap kapsait long ol Katolik pipel insait long Pot Mosbi Asdaiosis, ol brata bisop, pater na rilijes, ol pren, wantok hauslain na



GUTBAI GUTPELA WOKMAN: Praim Minista Se Michael Somare i wapela long ol planti Kristen pipel i bin stap long funereel sevis na hia em i givim laspela luksave long Bisop Cherubim. *Poto: Nicky Bernard.*

Praim Minista Se Michael wantaim sampela sinia gavman opisa na woklain i kam stap long gutbai na tok tenkyu lotu long laip na wok bilong em.


Asbisop John Ribat long toktok bilong em i tok tenkyu long gutpela wok bung wantaim namel long em na Bisop Cherubim. Em i tok Bisop Cherubim i save sambai redi long wok na maski em i sik o nogat, em i no inap long tok nogat long mekim wok.

"Em i wok i go inap em i dai. Em i pater bilong pipel na em bin redi gut long dai bilong em," Asbisop John i tok.

Planti Katolik manmeri bai painim dispela gutpela man i no save belhat, i save toktok isi, saveman i save glasim gut ol samting bipo em i autim tingting bilong em na givim ol gutpela stiatok.

Oi i kisim bodi bilong em i go long asples bilong em long Wewak tude long planim.

Wantok Niuspepa i tok tenkyu tru long yu tu bisop long ol gutpela tok-tok yu save givim long ol bikipela de olsem Krismas na Ista na long ol sampela arapela bikipela samting i karamapim sios na kantri. God i givim yu gutpela malolo.





Daiosis Rev. Cherubim Dambui, OBE, DD.


Bod. Menesmen, na wokman meri bilong Word Publishing Company na WANTOK NIUS-PELA i salim bikipela tok sore tru i go long femili bilong Auxsiliari Bisop bilong Mosbi

Daiosis Rev. Cherubim Dambui, OBE, DD.

Mama i bin karim Cherubim Alfred Dambui long 23 de bilong mun Februari, 1948 long ples Timbunke long Angoram, Is Sepik provins. Em i kisim baptais long mun Mas 1948 na i bin statim skul bilong em long St Mary's Timbunke long 1956 na bihain long Angoram praimeri skul. Long 1961 em i pinisim skul long Brandi na gohet long Kerevat. Long 1967 em i go long St John's maina seminari na long 1968 em i pinisim skul pater long Holi Spirit seminari long Bomana. Leit Bisop Leo Arkfeld i bin givim blessing long em olsem pater long 1974. Long 1976 igo 1979 Cherubim i bin wok olsem primia insait long Is Sepik Provinsal Gavman. Em i bin wok olsem pasta long Marienberg peris long yia 1989-90 na long yia 1995 igo 200 em i helpim Bisop Ray Kalisz olsem Pastorel Vika na vika jenerol bilong Daiosis bilong Wewak. Long yia 2000 ol i makim olsem Auxsitari Bisop bilong Daiosis bilong Mosbi, na em i kisim Episkopal odinesin olsem Auxsiliari Bisop bilong Mosbi Daiosis long Februari 10, 2001. Long 2003 em i wok tu olsem siaman bilong CIS Promosins Bod na long 2003 igo 2005 em i makim Sios insait long NCDC bod.

Papa bilong Leit Bishop Cherubim em Henry Nambau na mama bilong em Augusta Tukuai Nambau. Tupela wantaim i stap laip yet.

Papa God i ken Givim yu Gutpela Malolo



GIVIM LONG HELPIM: Nesenel Kapitel Distrik Gavana Powes Parkop long dispela wik Tunde i givim K5,000.00 sekmani i go long Katolik pater em Pater Michael Igo long helpim mekim ol wok long funereel sevis bilong Bisop Cherubim Dambui. *Poto: Nicky Bernard*

Tok tenkyu long Namta Peris

Mi laik tok tenkyu long ol manmeri bilong Namta Paris bilong Goroka Daiosis long helpim bilong ol long ol pipel bilong mi long kantri Polan (Poland) long Yurop (Europe).


Long las mun (Me) long kantri bilong mi Polan, planti ren i bin pun- daun na planti wara i tait. Dispela bikipela ren tru i bagarapim planti ples, ol taun na viles wantaim.

Planti manmeri i bin lusim haus bilong ol i bagarap long wara, wara i bagarapim ol gaden, na moa long 20-pela pipel i dai.

Long Sarere, Jun 19, ol tisa wantaim ol yut i raun wantaim wilbaro na kolektim mani bilong helpim kantri bilong mi. Bihain ol narapela ples bilong Namta Paris i mekim kontribusen. Ol manmeri i bungim, inap long K400. Mi Pater Kris mi amamas long paris bilong mi Namta. Papua Niugini i helpim Poland.

God i ken blesim yupela Namta. Tenkyu tru.

Mi Pater Kris Stachowiak, MSF.




LAGA BLEK I NAIS MOA YET! Ol prodak bilong stailim gras na lukautim bodi i pulim planti yangpela meri long eria bilong Blek Beauty prodak i kam aninit long Laga Indastris we Shellyanne Joseph wantaim lain bilong em i bin lukautim. Ol bikpela supamaketa na ol famasi long Mosbi na kantri i save baim ol prodak na salim.



BIKNEM REDIO MERI: Tupela biknem NAU na YUMI FM anaunsa we nek bilong ol i save pairap strong long redio em "Shazz" na Vavi Essie i wokim sampela toktok long makim Total Events kampani i menesim so.



BIKPELA INTRES: Tude ol yangpela PNG meri i laik lukautim gut skin bilong ol wantaim ol sanda i mekim bodi i smel na pillm nais. Planti i glasim na skelim na baim ol samting long Nivea tebol.



PROMOTIM OL HELTI KAIKAI : Kisim ol helti na gutpela kaikai bilong ol mama na pikinini i lukautim gut na strongim bodi we biknem kaikai kampani, Heinz i wokim olsem wokmeri bilong Hugo Canning, Betty Tom na ol pikinini bilong em i soim. Hugo Canning i save kamapim Ox& Pa, tinmit nau i gat holsel we haus long 17 Mail wantaim ol Heinz prodak kaikai i stap long piksa em ol bikpela stoa i ken odaim.

So bilong ol meri kam gut

Veronica Hatutasi i raitim

WANPELA gutpela so bilong ol meri i bin kamap long las Sarere na Sande long Holide Inn (Holiday Inn) long Mosbi we samting olsem 25 bisnis bilong ol meri grup i bin soim ol prodak o ol samting, sampela long ol, em ol yet i mekim na salim.

Tupela gutpela de stret we planti yangpela meri, ol mama na sampela man i bin raun i go na kam long lukim na baim tu ol samting we dispela ol bisniseri i wok long soim na salim long dispela tupela de. Moa long dispela, ol meri i bin go long so i bin amamas long harim ol musik we laip ben i pilaim, lukim ol kain fassen so bilong ol klos, ol kain promosen resis na bikpela samting we tupela laki meri i bin winim bikpela mani na Blekberi Dijisel telepon em long tupela de, Dijisel Fugitiv resis i bin kamap. Long tupela laki wina, wanpela i kisim K5,000 na nara-pela i kisim Blekberi telepon.

Het tok bilong dispela so em "What Women Want 2010" o Wanem Samting ol Meri i Laikim 2010". Bikpela sapot long putim kamap dispela so i kam long bikpela mobail kampani em Dijisel we i bin sponsaim Fassen Stej, Nivea Kea wantaim sapot bilong Post Courier, Nau FM na Yumi FM na Total Events Kampani i lukautim ron bilong em.

Meri Wantok i bin raun i go long so long tupela de na toktok wantaim sampela ol meri

long ol liklik bisnis bilong ol na tu, kisim piksa long ol na ol samting i kamap long dispela so.

Shazz bilong Nau FM i makim maus bilong Total Event Kampani i bin menesim so na toktok wantaim Meri Wantok long as bilong kamapim dispela so.

" Total Event Kampani i putim kamap kain so olsem long promotim ol meri na ol samting ol i we mipela i tingting long kamapim ol-geta yia sapos dispela namba wan so i go gut. Mipela i amamas long lukim ol man tu i kam na planti ol yangpela meri na man wantaim long lukim wanem samting ol i putim kamap long dispela so. Planti meri i gat ol bisnis na dispela i helpim long brukim banis na tude, ol meri i sanap long wankain level wantaim ol man. I gutpela long lukim planti bisnis meri, olsem 20 samting, i soim ol samting ol i mekim na salim. Mi bilip so bai kamap moa bikpela na gutpela long ol yia i kam," Shazz i tok.

Lukim nau so long piksa. I stap long Folder titled- Wtk 1872 Meripes So Piksa

Poto#1: SERIM AMAMAS! OL yangpela wokmeri bilong K K Kingston em Nita, Velari na Belinda i amamas wantaim wanwok bilong ol, Charlene Marjen i holim Blekberi telepon em i winim taim em i painim Dijisel Fujitiv insait long so eria. Ol seils meri i salim ol samting bilong lukautim helt, haus, ol bebi na lukautim bodi bilong ol meri na man.

FON HAUS: Wanpela spesel we Fon Haus i gat long en em nau em Duel Sim Kad fon Philips X100 i gat planti gutpela samting long en. Villindah na Solitaire Paglipari i bin bisi tru long ansaim ol askim planti lain i bin raun lukim eria bilong ol long tupela de bilong so i putim long ol.



PROMOTIM WOK BILONG OL MAMA: Mary Tanasu na Elizabeth Petrus i putim ol naispela nekles long soim long pablik em Matilda Lahis bilong Solomon Ailan i marit long Buka i wokim long han yet. Ol kain naispela bilas nekles long putim long nek, yau, han na lek i pulim planti kastoma i gi long tebol bilong em.



TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)

Kambodia gavman apim pe bilong ol klos wokmanmeri

GAVMAN bilong Kambodia i putim tingting long wanpela 5 US dola i go antap long mak bilong pe bilong ol wokmanmeri i save somapim klos, em namba i stap daun tu long askim i kam long ol yunion lida bilong kantri.

Phnom Penh Post i ripot olsem, ol pipel i makim gavman i plen long holim miting wantaim ol pipel i makim ol Yunion na ol papa bilong ol fektori long wik bihain bilong toktok long tingting i kam long Leba Advaisari Komiti.

Pe bilong wanpela ful taim wokman em 50 US dola long wan mun.

Ol yunion i bin askim long mak bilong pe i go antap namel long 70 na 90 dola long wan wan mun.

Ol bosmanmeri i no kamaut long pablik na tokaut long hãmas ol i tingting long givim long apim pe mak.

Paula laikim ADB dinau long wokim gutpela wara saplai

PASIFIK Ailan kantri bilong Palau i laikim wanpela dinau bilong Esian Dvelopmen Benk (ADB) bilong kirapim na lukautim wanpela gutpela wara saplai na projek bilong gutpela helti pasin na sindaun.

Phil Bowen, Eksekutiv Dairekta bilong ADB i stap long Manila, i tok dispela projek em bai ol i kamapim long narapela foa i go inap long faivpela yia, na bai kostim samting olsem 16 milian US dola.

Em i tok, dispela dinau bai helpim Palau i putim ol wara mita sistem long Koror na Airai, na bihain long ol narapela stet bilong lukim ol pipel i yusim gut ol wara na pasim ol ples we wara i wok go aut.

Iran i no laik statim ol toktok gen wantaim wes long nuklia program

IRAN i sakim ol askim bilong statim gen ol toktok wantaim wes long nuklia program bilong em i go inap long mun Ogas.

Dispela i bekim bek bilong nupela ol intanesenel tok tambu i go long dispela islamik gavman.

Midel Is ripota, Anne Barker, i ripot olsem Presiden Mahmoud Ahmadinejad, i sutim tok long ol bikipela wol pawa long putim ol tambu bilong givim ol gutpela sindaun long statim ol toktok gen, na i tok, ol kantri i laik stat long ol toktok i mas tokaut sapos ol i laik bai i pren o birua bilong Iran, na tu ol i tokaut i no



MISIS PRAIM MINISTA: Namba wan meri praim minista bilong Australia, Julia Gillard i go insait long opis bilong praim minista aste, Trinde. Leba pati bilong Australia i makim em praim minista long senisim Kevin Rudd las wik Fonde.

laikim ol nuklia samting bilong pait em Israel i gat.

Dispela ol nupela tambu i karamapim ol foren asets bilong ol Iran kampani, ol invesmen bilong en long uranium na taribu long Iran i noken baim sampela ol kain bikipela gan bilong pait.

Saina midia i mekim strongpela toktok agensim US Presiden

STET midia bilong Saina i mekim strongpela toktok agensim US Presiden long em i autim tingting olsem, Saina gavman i no luksave long pasin bilong Not Korea long sikirapim bel bilong Saut Korea.

Barack Obama i tok, Saina i no mas sojm 'wilful blindness' long samting em i kolim, 'Pyongyang's "belligerent behavior" na i tok em i toktok pinis wantaim Presiden bilong Saina long dispela samting long wiken G20 Samit.

Yunaitet Stets i bin wok long mekim strongpela askim i go long Saina long sapotim wanpela resolusen long Yunaitet Nesens Sekyuriti Kaunsil i tokaut strong long i no laikim wok Not Korea i bin pelim long mekim wanpela Saut Korea wosip i go daun long si long mun Mas.

Tok inglis niuspepa Global Time, em Komunis Pati bilong Saina i bosim, i tok

ol toktok bilong Obama long wok bilong Saina rijen em i 'irresponsible' na 'flip-pant'.

IMF bai peim aut namba tri hap bilong mani i go long Sri Lanka

INTANESENEL Monetari Fan bai peimaut mani em i bin holim bek long 2.6 bilian US dola dinau i go long Sri Lanka, olsem wok bilong helpim kantri i stretim wari bilong mani bilong em i no strong tumas.

Long mun Februari, IMF i bin holim bek 400 milian dola peimen bihain long Sri Lanka gavman i bin misim 2009 defisit ridaksen taget.

Deputi Menesa bilong Fan i tok, sapos gavman i karimaut ol tingting insait long 2010 baset bilong em, em bai stretim ol samting em i no bin nap mekim long stretim mani pastaim.

Naoyuki Sinohara i tok, olgeta eria bilong ekonomi long Sri Lanka i wok long kamap gut na i lukim olsem ekonomi bai gro strong long dispela yia.

Pati lukautim gavman long PNG i noken fosim lida long risain

POLITIKAL pati nau i lukautim gavman

long Papua Niugini i tok, em i no inap fosim lida bilong em, Se Michael Somare lusim opis long wanem, long ol presa i kam long ol non gavman ogenaisesen na oposisen.

Insait long sampela taim nau, Praim Minista, i bin fesim sampela ol askim i kam long ol biknem man na meri na ol NGO, na oposisen long em i step daun long sampela ol isiu i no bin go stret. Sampela ol mausman na ol pas i go long edita i yusim lidasip senis bilong Australia olsem piksa long mekim ol nupela askim long Se Michael long lusim sia bilong em.

Tasol Presiden bilong Nesenel Alaiens Pati, Simon Kaiwi, i tok pati bai bihainim lo bilong mekim disisen long wanpela senis long lidasip, dispela i no nap kamap long wanem ol narapela i wok long autim tingting bilong ol.

Em i tok, em olsem samting i kamap long Leba Pati bilong Australia, wanpela senis bilong lidasip long Nesenel Alaiens bai kamap bihainim yet tingting na laik bilong pati, na long dispela taim, em i sapotim yet lidasip bilong Se Michael.


Em i bin tok welkam long Julia Gillard olsem nupela Leba lida na namba wan meri praim minista bilong Australia. Em i tok, Nesenel Alaiens na ol koalisen patna bilong em i givim bikipela sapot long ol meri long Palamen.

Pacific BEAT

4. 5. 6am & 4pm. 5pm
including sport

Listen to Radio Australia
101.9FM Port Moresby

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat



Jada 2010

Planti disisen bilong gavman kirapim paia

LUK olsem dispela gavman bilong Somare bin kamapim sampela bikpela disisen o ol senis we planti ol dispela disisen na senis wok long kirapim salens na kot salens yet.

Wanpela bikpela disisen gavman bilong Somare bin kamapim em long Lo bilong rausim ol kaunsel presiden long kamap olsem memba bilong Provinsal Asembli long wanwan Provinsal Gavman bilong ol. Dispela disisen ya bin karim kaikai na wok klostu tripela kris-mas olgeta inap Suprim Kot bin harim na rausim dispela disisen bilong gavman tupela wik i go pinis.

Minista Pablik Sevis long dispela taim em memba bilong lalibu Pangia Peter O'Niell na em bin go pas long kamapim dispela senis we em i wanpela han bilong Lo insait long Lo bilong Lokol Level Gavman (LLG).

Olsem na dispela i soim olsem disisen bilong Gavman bilong Somare long mekim dispela i paia bek long ol gen bikos nau olgeta Kaunsel Presiden bilong wanwan Lokol Level Gavman bai go bek long en i stap.

WANTOK SISTEM

asembli bilong ol.

Nau gavman laik kamapim wanpela senis gen long rausim na senis sampela hap pawa bilong Ombudsmen Komisn tasol ol pipel bilong Papua Niugini holim bikpela straik long dispela. Yumi harim gavman i stapim dispela senis bilong ol long noken kamap olsem na palamen i no mekim wanpela samting yet long dispela.

Nau gavman go het na kamapim narapela senis bilong Lo we i lukautim ol samting long bus graun na wara ol kolim Envaromen Ekt o Lo.

Taim gavman kamapim dispela senis long palamen ol manmeri bel kros na mekim planti nois long dispela.

Tasol dispela em kamap Lo pinis na Oposisen i wok long askim gavman long rausim gen dispela Lo long palamen taim ol sindaun long bung. Dispela senis i no kamap yet na ol pipel wok long putim was long en i stap.

Las wik tasol yumi harim olsem gavman makim man long kamap gavana jenerel bilong Papua Niugini tasol gavman bilong Somare i no bihainim stretpela rot bihainim Lo long kamapim dispela samting. Ol abrusim tru rot bilong Lo long makim bek Sir Paulius Matane long stap yet long Gavana Jeneral.

Nau yumi harim olsem ol arapela kendidet husat bin sanap resis tu long kamap Gavana Jeneral laik karim dispela samting go long kot bikos ol ting gavman i no bihainim Lo long mekim dispela.

Tingim Gren Sief Sir Paulius Matane em gutpela man we olgeta pipel bilong Papua Niugini save long em tasol pasin gavman mekim ya nogut bai givim sem long turangu dispela gutpela man. Em i no man bilong laikim kain hait o krangi pasin olsem. Em man bilong toktok egensim tru ol pasin korapsen o hait na paul pasin insait long ol gavman sistem, komyuniti na famili laip bilong yumi.

Luk olsem planti disisen na ol samting dispela gavman bilong Somare wok long kamapim i gat pasin kros na straik na kot salens

wok long kamap. Olsem na yumi tingim tasol sapos dispela gavman inap kisim gutpela nem long kain pasin olsem.

Gavman save kisim gutpela luksave na wanbel bilong pipel taim ol mekim gutpela disisen na senis we inap sevim gut ol pipel bilong kantri na ol inap painim gutpela sindaun na amamas long en.

Dispela em mak nogut long olgeta memba bilong pati we Somare go pas long en bikos ol pipel bilong ol dispela wanwan memba bai no inap amamas long memba bilong ol i mekim samting we i no stret long nem bilong pati na gavman ol go pas long en.

Planti memba inap lusim ileksen long dispela rot tasol we ol pipel no inap amamas long pati na gavman bilong ol wantaim lida bilong ol.

Tingim, ol Australia i senisim Praim Minista Kevin Rudd long dispela kain pasin tasol. Ol pret nogut ol bai lus long ileksen olsem na ol mas senisim pati lida na lida bilong Gavman bilong ol hariap. Nogut lida bai karim ol go kapsait long baret.

WANTOK KOMENTRI

Yupela makim husat?

DISPELA yia i wok lukim planti askim i sut long gavman bilong Somare na Temu olsem, ol i makim husat tru na holim gavman i stap?

Planti ol senis dispela gavman i wok mekim, em kantri i no wanbel wantaim.

Ol i kamapim ol senis long Mama Lo bilong kantri, na taim pipel i belhat, ol i tok olsem, "Yupela nogat save. Mipela ol lida i gat save long mekim lo. Pipel i makim mipela."

Orait, taim pipel i kisim ol i go long kot, ol i tok, em i orait, mipela bai go na senisim lo.

Nau i gat planti hap kona bilong kantri, i stap ausait long Is na Wes Sepik, i wok long singaut strong olsem 'Chief' i mas lusim wok praim minista.

Ol bikmanmeri long kantri tu i wok long paitim toktok na givim tingting bilong ol olsem, planti samting i no sindaun stret insait long kantri bilong yumi.

Tasol husat bai rausim lida bilong gavman? Na husat bai tokaut stret bekim dispela askim long gavman i makim husat tru na mekim ol paul pasin i stap?

Sir Michael yet em i tokaut pinis olsem 'ol Sepik tasol i ken rausim mi'.

Ating em i bilip strong olsem ol Sepik i votim em, olsem na ol tasol i ken rausim em long balot bokis.

Tasol olsem wanem long ol arapela manmeri bilong kantri? Sapos em i holim wok praim minista, em i no makim ol tu?

Nau, gavman i kamap olsem bisnis patna bilong ol foren investa long ol bikpela maining na petroleum projek long kantri pinis, na em i hat moa long gavman i luksave long ol asua em i wok mekim.

Aste, yumi stat long lukim olsem ol pipel i no moa longlong na larim gavman i giamanim ol. Nau ol i wok sanap.

Maski i gat wanpela oda i kam long opis bilong het fo man bilong kantri, Atoni Jeneral Ano Pala, olsem i tambu tru long bung o mas na protes agensim Envaronmen Lo senis gavman i kamapim, ol pipel long Madang i bilip olsem ol i gat rait yet long mas na tok dispela lo i no gutpela long ol.

Yumi pipel i mas pret long ol samting gavman i wok mekim tude. Em i wok long guria tru olsem kantri bai abrusim bikpela hap mani sapos ol bikpela risos projek i no go het. Na nau, ol i wok lus tingting long laip na sindaun bilong ol lain i votim ol.

Olsem na yumi askim ol gen, bai ol mas skelim gut tingting na luksave long pasin ol i gat tude.

Yupela makim mipela ol pipel, o yupela i makim gridi pasin bilong yupela yet?

WANTOK

Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00


General Manager
Elizabeth Konga

Editor
Neville Choi

Published at
Section 58, Allotment 3
Office 2, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.


Wolnius long poto...




MIPELA WIN: Tim bilong Paraguay i amamas taim penalty bilong Oscar Cardozo i skorim wanpela gol long wanpela penalty sutaut long Raun 16 bilong 2010 FIFA Wol Kap long Saut Afrika agensim Japan long Loftuz Versfeld Stadium.



NOGAT NAU: Yuichi Komano bilong Japan, husat i kepten bilong Japan wol kap soka tim, i bun slek olgeta bihain long em i bin abrus long skorim gol long penalti sutaut agensim Paraguay. Japan i go aut long resis nau, na Paraguay i bai pilai yet.



BELHAT: Long dispela poto long Sarere las wik, ol protesta i bagarapim wanpela polis kar long Toronto, Kanada. Ol i pait wan-taim polis taim ol i protes agensim kibung bilong 20 bikpela kantri long wol. Dispela kibung, ol i kolim G20. Maski ol i skelim \$900 milian long wok sekyuriti bilong dispela kibung, ol dispela lain husat i werim ol bilakpela klos na haitim pes bilong ol i bagarapim sindaun tru insait long siti.



BELHAT LONG OL OIL KAMPANI: Wapela protesta long Ingran ol i kolim ol yet 'The Good Crude Britannia' i laikim bai oil kampani bilong Briten, nem bilong en Tate, i lusim British Petroleum (BP), husat i no pasim yet oil i wok long lik i go long solwara. Dispela protesta i kapsaitim wapela bilakpela wara olsem oil long graun ausait long opis bilong Tate Britain dispela wik.



KALABUS DANIS: Dispela poto i soim ol kalabus long Cebu Provinsel Haus Kalabus long Filipins i danis na mekim sain bilong pis o belisi long Jun 26. De we biknem musik man Michael Jackson i bin dai las yia. Ol dispela kalabusman i gat nem pinis long stail danis ol i save mekim. Ol i mekim dispela danis long tingim na makim dai bilong Jackson. (EPA Poto i kam long AAP Images)

PNG gat planti blesing long graun...



Fidel Koldop Laka save laik tru long painim kaikai bilong em yet long gaden bilong mipela.

Hilda Wayne i raitim

OLGETA hap long kantri bilong mipela Papua Niugini i gat gutpela graun we God yet i givim tumbuna bilong mipela i kam inap nau.

Ol liklik pikinini i save lainim pasin bilong mekim gut gaden na kamapim kaikai long wanem em i kastom na kalsa bilong mipela stret.

Planti mipela save lanim ol gutpela pasin kalsa na kastom long ples na tu long skul.

Graun em wanpela samting we mipela i gat planti tru long kantri bilong mipela we i gat planti pis long solwara na kaikai na abus long bus.

Taim mi kam long Australia klostu tupela yia i go pinis, wanpela pren meri bilong mi tokim mi olsem ol i save baim graun bilong mekim gaden long stua.

Dispela lapun meri pren bilong mi nem bilong em Anne Taylor, na em i lainim mi planti samting na pasin bilong ol pipel bilong Australia we mi no save klia long en.

Pasin bilong ol waitman na tingting bilong ol. We bilong mekim gaden tu na kaikai.

Taim Misis Taylor i tokim mi olsem graun em ol i save baim long stua, mi lap na ting em i tok pilai.

Taim mi lukim gaden bilong Anne, mi lukim olsem graun i no gutpela na i olsem wesana bilong nant s.

I hat tru long putim kaikai go insait long dispela kain graun.

Lapun meri ya bekim lap bilong mi na tokim mi olsem mi no stap long ples bilong mi moa. Em Australia, na mi mas lainim planti samting long em.

Bihain mi yet wantaim famili bilong mi bungim sampela moa gutpela pren long nupela kantri Australia. Ol dispela pren tu i save laik tru long mekim gaden baksait long haus bilong ol. I no ol bikpela gaden we mipela i save gat long ples. Em ol liklik blok tasol na olgeta kaikai em ol i planim gut tru. Graun em ol baim long stua mak olsem K200 bilong liklik blok tasol. Sapos ol i laik mekim bikpela gaden em ol i mas lusim moa mani. Ol samting olsem lip bilong diwai, pekpek bilong kakaruk na ol narapela samting bilong helpim graun bilong ol em ol i save baim long stua tasol. Kaikai ol i save planim i no olsem we mipela i save lukim long Lae, Goroka, Kavieng o Hagen maket. Wanwan tasol na ol

i save putim bikpela hatwok na mani long baim graun bilong ol. Kaikai tu em bai yu no inap planim long olgeta mun na yia. I gat foapela kain sisen i stap long dispela ples Westen Australia na kaikai tu em mas bihainim dispela foapela sisen. I no olsem ples we mipela save planim olgeta kaikai na i no wari long ren, kol o san. Sapos yu planim kaikai long rong taim bai ais i kukim nogat em ol binatang bai kaikai long taim bilong san. Kokonas long maket bilong mipela mak long 50 toea em K10 long hia. Foapela liklik kaukau tru em mak long K6. Banana bilong kukim em ol i save kisim long kantri Fiji na Tailan insait long aisbokis. Mi lukim dispela na mi tingting long ples bilong mipela Papua Niugini we God i blesim mipela gut tru wantaim kainkain gutpela samting we i no save stap long sampela narapela ples long dispela graun.

Sampela mun bihain, mi na famili laik traim mekim gaden bilong mipela yet long hap we mipela i stap.

Mi kisim skul pinis long ol pren olsem na nau em mi yet laik traim. Mi planim kain kaikai olsem brokoli, kebis, kerot, letis na bin. Famili bilong mi amamas long dispela liklik gaden kaikai bilong mipela yet na planti Papua Niugini famili na pren i save kam raun na kisim kaikai tu long liklik gaden bilong mipela. Sampela meri bilong mipela yet long Papua Niugini tu em mi tok-save long ol long we bilong mekim gaden nau na ol yet statim gaden bilong ol. We bilong mekim gaden em ol i save tasol tingting bilong baim graun em mekim het bilong mipela pen liklik.

Mi salim wanpela piksa bilong gaden i go long wanpela lokol niuspepa long taun mipela stap ol i kolim Rockingham na ol i putim piksa long pepa. Sampela lain asples Australia yet husat i save mekim sosol komyuniti wok wantaim ol refuji lain i lukim piksa bilong gaden bilong famili bilong mi na ol i askim mi long helpim ol. Mi ting olsem bai mi helpim ol asples yet long mekim gaden tasol nogat. Ol i askim mi long helpim sampela lain refuji bilong Sudan long Afrika. Dispela ol lain refuji i bin lusim ples bilong ol na ronawe taim bikpela pait na hevi i kamap long kantri bilong ol sampela yia i go pinis. Ol i no karim wanpela samting wantaim ol taim ol i lusim kantri bilong ol na ronawe. Bihain Australia i luksave long hevi bilong ol na givim tok orait

long kisim ol kam stap long Australia. Ol i amamas tru long gutpela sindaun bilong ol long nupela kantri na ol tu i wok long lainim planti pasin.


Taim mi go bungim ol, planti ol lapun na pikinini na yangpela meri tu laik bungim mi bilong wanem ol i lukim piksa bilong gaden bilong mi long niuspepa na ol i laik tru long lainim. Ol i ting olsem mi tu mas bilong kantri bilong ol tasol mi tok kantri bilong mi klostu long Australia na ol i amamas tru long bungim mi. Taim mi stori long kantri bilong mipela ol i laik tru long lainim moa na planti askim na bekim i go kam na mi tu amamas long toktok wantaim ol.

Wanpela samting we ol dispela lain refuji i tokim mi em mi no lusim tingting. Ol i tok olsem ol i no save lukim blekpela graun long laip bilong ol na ol i no save long ol bik bus na diwai na wara. Ol i save lukim long piksa na buk tasol. Taim ol i kam long Australia ol i lukim planti samting. Taim mi stori long Papua Niugini, ol i askim mi bilong wanem mi kam wantaim famili bilong mi long Australia na lusim gutpela kantri bilong mi yet. Ol i tok ples bilong ol em bikpela san i save bagarapim na nogat wara na taim pait i kirap ol i lusim ol liklik samting bilong ol na ronawe. Ol i tok pestaim tru ol i lukim blekpela graun em long wanpela refuji kem we ol i bin stap long en long Sudan. Ol lain Yunaitet Nesens i bin karim ol boks graun bilong ol refuji lain i ken planim kaikai long en.


Mi pilim bikpela sori tru long ol dispela turangu lain na mi amamas long lainim ol olgeta samting na pasim bilong mekim gutpela gaden. Sampela taim mipela i save askim na askim yet long kisim samting we mipela i no nidim tumas. Planti pait na hevi i save kirap long ples bilong wanem mipela i no lukim olsem God i blesim kantri bilong mipela gut tru. Graun em laik bilong mipela tasol planti yangpela i no save putim han long graun na wok. Les pasin i mekim ol pipel bilong kantri i lusim pasin bilong hatwok na kisim samting long graun.

Taim ol kain turangu lain i toktok olsem long mipela, mipela i ken luksave long olgeta blesing we Papa God yet i givim long mipela na mipela i ken amamas moa.

Yumi lukautim graun bai graun tu i lukautim mipela.



Liklik refuji boi lain long mekim gaden wantaim mama bilong em.



Ol refuji meri bilong Sudan amamas tru long lainim pasin bilong mekim gaden.



Fidel Koldop Laka i holim wanpela brokoli long gaden bilong em yet. Ol Poto: Hilda Wayne

MP Biyama mekim rekot wantaim planti gaden tru

James Kila i raitim

MEMBA bilong Midel Flai, Roy Biyama em wanpela narakain lida tru na wanpela man tru long holim graun na hatwok stret long wokim gaden.

Dispela nesinel memba bilong Palamen i gat gaden bilong em i stap long olgeta wan wan lokal level gavman kaunsi (LLG) wod insait long distrik bilong em long Midel Flai.

Ating dispela em wanpela rekot ol histori stret long PNG, we wanpela Nesinel MP i win tru long gat gaden na ol fres kaikai i gro long olgeta LLG wod long distrik bilong em.

Ol niuslain bilong Mosbi i bin painimaut i no long taim i go insait long raun bilong ol i go long kisim ripot long namba 8 Gogodala Kanu Festival em Mista Biyama yet i go pas long sponsa long en.

Brian Andrews, husat em wanpela menesa long stua bilong Mista Biyama long Balimo i stori long ol niuslain olsem Mista Biyama i gat gaden long ol ples long Kimama, igo long Kotale, Awaba, Kewa, Pisi, Tai na tu igo olgeta long las ples insait long Midel Flai em Ali.

Ol arapela lokal pipel tu i stori olsem dispela memba i gat gaden kaikai i stap long olgeta kona insait long distrik bilong em.

Tru tumas, Mista Biyama soim tru olsem em man bilong holim graun na stap yet wantaim ol liklik manmeri long ples na tingting bilong em i stap yet long wokim gaden na kamapim ol naispela fres kaikai.

Planti ol pipel we Wantok Niuspepa i kisim stori long ol i tokaut stret olsem memba bilong ol em man tru long daunim em yet. Em save wokim gaden na mekim han na pinga bilong em doti.

Mi wantaim ol narapela niuslain long Mosbi i bin painimaut long kain pasin bilong dispela memba i no long taim i go pinis long taim ol bin go long Balimo long lukim namba-8 Gogodala Kanu Festival.

Mi bin makim Wantok Niuspepa long go wantaim ol narapela wanwok long bilong ol narapela nius ogenaisesin long go long Balimo. Ol narapela lain we mipela i bin go wantaim long Balimo em Turner Arifeai (Kas T) bilong YumiFM radio stesin, Peter Sea bilong Post Courier, Jason Gima Wuri bilong The National, Dora Kinavai bilong NBC

na kamera man bilong em Glen na wanpela ofisa bilong Turism Ofis, Paul Kosof.

Bihain long Gogodala Kanu Festival, mipela i painimaut olsem balus bai ino inap kam long de ol i makim long en long kisim mipela igo bek long Mosbi. Olsem na long yusim dispela fri de, mipela toksave long memba long lukluk raun long ol ples na riva long hap bilong Midel Flai distrik.

Mipela i kalap long moto bot na bihainim liklik ol han wara i go join wantaim Aramia riva na mipela i ron i go. Ples i luk nais tru na kamera man bilong Kundu Televisin, Glenn ino westim taim long kisim ol poto long vidio kamera.

Mipela i ron yet igo na mipela i abrusim Awaba stesin na skipa bilong bot i tok olsem ating mipela i mas go lukim narapela gaden bilong Mista Biyama.

Tru tumas, taim mipela igo kamap mipela olgeta i guria stret. Ol gaden kaikai olsem yam, taro na ol kain kain banana i kamap gut tru. Wanpela lokal man long ples i wok long lukautim gaden i stap na i soim mipela ol kaikai we i gro insait long gaden.

Buai gaden Mista Biyama ino save kaikai buai, tasol meri bilong em bilong ples lokea insait long Galp provins em meri bilong kaikai buai stret. Olsem na Mista Biyama i planim planti buai arere long haus bilong em long Balimo taun.

Mi bin laki tru long dispela taim long Balimo bikos taim mi wok long painim buai i stap, Mista Biyama wantu tasol i tokim ol boi bilong em long go antap na kisim wanpela rop buai i kam givim mi.


Buai ino save gro gut long Midel Flai eria bikos ples i tais na bipo yet taim ol lokal pipel i planim buai, ol dispela kru buai save dai.

Tasol, Mista Biyama yet i kamap wantaim stail bilong em yet na i miksim karanas wantaim graun arere long haus bilong em na planim liklik blok buai bilong em. Na tru tumas, ol dispela buai i gro gut tru na nau planti ol dispela buai i karim ol bikpela rop na mit bilong ol dispela buai i nais tru. Mipela ol niuslain i traim pinis taim mipela i karim rop buai long moto bot na mekim save long kaikai.

Wantok Niuspepa i bin stori liklik wantaim Mista Biyama na em i tok olsem planti ol gaden kaikai em i groim long ol gaden em ol



Mista Biyama lukim ol boi bilong em i kamautim Afriken yam em yet i planim arere long haus bilong em long Balimo.



Biknem redio anaunsa bilong YumiFM Kas T i raun glasim ol kaikai insait long gaden bilong MP Biyama. Poto: James Kila


MP Biyama i rausim rop buai long gaden arere tasol long haus bilong em long Balimo taun na givim long ripota James Kila.

lain long Nesinel Agrikalsa Riset Institut (NARI) i mekim wok traim long ol long kamapim insait long ples olsem Midel Flai.

Ol dispela gaden kaikai olsem Afriken yam na ol narapela kain banana bilong ol narapela provins we NARI i traim planim em Mista Biyama i kisim na groim tu long ol gaden bilong em long lukim sapos ol dispela gaden kaikai i ken gro gut.

Mista Biyama i tok olsem maski olsem Midel Flai i stap long tais ples, tasol i gat ol gutpela graun tu i stap long ol bus na ol liklik ailan namel long ol riva we ol kaikai i ken gro gut.

Ating Mista Biyama i win tru na ating em i brukim rekot tru long PNG na wol olsem wanpela MP husat i gat gaden kaikai long olgeta LLG wod long distrik bilong em.



Raun wantaim Kanage olgeta wik

Kros long beltait

WANPELA moning, papa Kanage go wok long gaden. Em wok i go. na hangere kisim em. Em kam bek long haus na meri bilong em skelim kaikai bilong em. Kanage kaikai pinis na em tokim meri na pikinini meri bilong em, "yu tupela i go na karim ol paiawut mi brukim pinis na i stap long gaden". Pikinini meri bilong em les. Papa Kanage belhat na em tokim em, "Yu les long wanem! Bai yu stap tasol olsem! Bihain yu marit, man bilong yu bai mekimsave long yu long dispela kain pasin". Mama harim Kanage hatim pikinini meri na em tokim Kanage, "Inap ya! Maski long kros". Papa Kanage tanim em tokim mama, "Mi gat rait long kros na skulim em long wok. Yu noken tokim mi long pasim maus. Yu tupela les long mi kros, orait, yu tupela i go na painim rot long kaikai na kisim mani!"

P Posou
Manus

Rais i no kuk yet...

KANAGE i stap wantaim meri bilong em longpela taim nau. Wanpela apinun, meri bilong Kanage i redim pot kaikai na putim long paia. Meri hariap i go waswas bikos em ples i hot. Em tokim Kanage long was long pot kaikai long paia. Em i go waswas na em lus tingting long kisim sop. Em i go bek long haus long kisim sop. Em i go antap



long kisim sop na lek bilong em i wel na turangu hariap holim sait long haus. Tasol taul i lus. Kanage lukim olsem na em i opim ai na tok, "Aiyo...., rais i no kuk yet na Ox & Palm op pinis..."

Soulist Raiiotz
Madang

Pasim meri pikinini

TAIM bilong ileksen na ol kainkain kendidet i go kempen long ples bilong Kanage. Kanage pinis long gaden na wokabaut i kam daun long rot na lukim planti kar i ron wantaim ol manmeri antap na singaut wantaim i go long ples. Taim Kanage i wokabaut i kam, wanpela kendidet i singaut long Kanage, hei paps, inap yu pasim meri pikinini bilong yu na givim long mi. Em i min long pasim vot na givim long em. Tasol lapun Kanage i bel kaskas na tokim kendidet ya 'Yu yet pasim bilong yu na givim i kam na bai vot i go long yu'

Mambu
Wantok Bilong Yu Yet

Inglis em yu ya

SIPI em wanpela lapun man na em i no skul long bipo. Tasol oltaim em laik tok inglis. Olsem na taim em i raun na harim ol manmeri i tok inglis, em save

lokim tasol long het na stap. Wanpela taim em sindaun wantaim Kanage na pikinini bilong em i bik het. Kanage tokim pikinini long 'stap isi tasol pikinini tanim na bikmaus long Kanage. Sipi bel hat olgeta na singaut long tok inglis, "Hey Son! Don't you off the maus to your father. I you father grow you big!" Kanage i laik paitim pikinini bilong em tasol isi em lusim em i go na lap stret long toktok bilong Sipi.

J Baiwara
Mosbi

"I come from the stua"

WANPELA moning Kanage i go baim tinpis long stua na wokabaut i kam bek na bungim wanpela waitman long rot. Waitman i kirap na tok moning long Kanage. Waitman ya askim Kanage, "Where did you come from?" Kanage i bekim, "I come from the stua". Waitman askim gen, "What did you do there?" Stail Kanage bekim, "To bought a tinpis". Waitman askim gen, "What are you going to do with that tinpis?" Kanage bekim las wan, "Jas to eat angens the rais!"

LT
Kavieng

Kidim feelings

PAPAS Kanage em bilong Suon ples long Erap, Morobe Provins. Wanpela taim ol lain bilong em

long Kimbe salim tok long em long kam raun lukim ol. Kanage i go kisim ol lip brus bilong em long gaden na pasim ol redi long go long Kimbe. Lapun Kanage kalap long sip na i go long Kimbe. Wanpela de, lapun Kanage kisim ol lip brus bilong em na i go long maket long salim. Long maket, lapun Kanage lukim wanpela yangpela meri. Lapun Kanage trai lek na wok long wokim ai long meri i stap. Meri ya i no bisi long Kanage na em wokabaut i go. Kanage wokabaut hariap i go long baksait bilong meri ya na holim han bilong em. Meri ya kirap nogut na tok inglis: 'Hey, what's wrong with you?' Papa Kanage bekim tasol olsem: 'I jus akism yu bilong kidim feelings!' meri ya kros na tok: 'Plis, I am not your partner'. Taim lapun Kanage harim dispela toktok, papa ya paul olgeta na tok: 'That's ol-rait. I just want to be your pren for nau tasol'. Bekim bilong Kanage wokim na ol man meri long maket holim bel tasol na kaikai pinga.

Yabi Nain
Erap

Ol skwat!
Salim ol gutpela Kanage tok pilai i kam long:
Kanage Tok Pilai
P.O. Box 1982,
Boroko, NCD
Port Moresby.
Email:
atolire@wantok.com.pg

Mi gat wari na mi laikim helpim long Laiplain

Dia Laiplain,

GELPREN bilong mi i ting olsem mi wok long raun wantaim ol narapela meri long wanem mi go wok 6-pela mun pinis na tu, ol bipo gelpren bilong mi i wok long ringim mi. Tasol mi tokim ol olsem mi klostu marit nau. Tasol ol i no lusim mi. Mi painim hat long rausim ol. Bai mi mekim wanem?


MISUNDERSTOOD

Dia Pren,

PLANTII manmeri tude i wok long bungim wankain hevi. Dispela em i wankain hevi we planti man na meri i save bungim tude.

Tras o luksave olsem narapela patna i no wokim nabaut na lav em i bikpela samting long kain prensip bilong yu. Na sapos yu no trastim patna bilong yu, lav o laik pasin bilong yutupela i ken i dai.

Yu mas traim long skelim ol



wanem samting yu wokim long soim laik pasin long gelpren bilong yu.

Yu save rait o ringim gelpren bilong yu tu o nogat? Gelpren bilong yu i laikim yu long soim em olsem yu gat laik pasin long em yet long wanem, yu wok long we long em.

Yutupela i plen pinis long marit na sindaun bilong yutupela long bihain taim o nogat? Sapos yu wokim dispela, em bai soim em olsem yu gat bikpela tingting long prensip bilong yupela na dispela bai karim yutupela i kam bung wantaim.

Yu bin tok ol narapela gelpren bilong yu long bipo i save

ringim yu long telepon. Yu bin strong long tokim ol olsem yu klostu marit nau long narapela meri tu o nogat?

Sapos ol i save kam raun klostu long yu, orait gelpren bilong yu i mas harim long ol narapela olsem na em i save kros. Long dispela as, yu mas strong long abrusim ol narapela meri.

Sapos ol i no lusim yu, orait yu mas brukim dispela prensip bilong yu wantaim ol.

Tasol long nau yu mas rait yet i go long gelpren bilong yu na sapos ol samting i no kamap gut, orait yutupela i mas sindaun na toktok long dispela. Yutupela i sindaun na stretim ol wari bilong yupela tu o nogat?

I gat ol pasto long lotu we ol i save wokim ol kos na kaunseling long redim ol manmeri long marit.


Na tu, i gat ol buk ol yangpela manmeri i raitim long we yu ken ritim long helpim yu na

lukluk wantaim hop na amamas long marit.

Kain buk olsem "I Married You" o "Mi Maritim Yu" we Walter Trobisch i bin raitim na ol arapela olsem Charlie Shedd i ratim, "Letters to Karen" na "Letters to Phillip" em ol gutpela buk wantaim ol narapela yu i ken ritim. Bai yu painim ol dispela buk long ol Kristen Buk Sop (Christian Book Shop).

Pren bilong yu, Laiplain Sapos yu gat wari o hevi, rait i kam long Lifeline, P O Box 6047, Boroko, NCD. Yu ken ringim mipela tu long telipon namba 3260011. Raitim trupela nem na etres bilong yu i kam na bai mipela i salim bekim long pas bilong yu. Mipela bai toktok long ol trupela samting yu askim long em tasol bai mipela i no inap long putim trupela nem bilong yu.

Laiplain



NEM: Janeth Sango
KRISMAS: 21 (meri)
ADRES: Pes Catholic Mission, P.O Box 36, Aitape, Sandaun Province
SAVE LAIKIM: Pilai soka, harim musik, mekim pani, na was was long solwara

NEM: Jonilla Napus
KRISMAS: 19 (meri)
ADRES: Pes Catholic Mission, P.O Box 36, Aitape, Sandaun Province
SAVE LAIKIM: Harim musik, go lotu, lukim TV, mekim penpren na mekim pani

NEM: Gorethy Walete
KRISMAS: 19 (meri)
ADRES: Pes Catholic Mission, P.O Box 36, Aitape, Sandaun Province
SAVE LAIKIM: Harim musik, go lotu, pilai soka na basketbol, mekim pani, lukim TV, mekim penpren na waswas long solwara

NEM: Thaile Enarekic
KRISMAS: 29 (man)
ADRES: P.O Box 60, Fincshafen, Morobe Province
SAVE LAIKIM: Pilai musik, raitim ol pas na long painim penpren

NEM: Angeline Yovana
KRISMAS: 18 (meri)
ADRES: C/- Bema High School, PMB. Lae Post Office, Morobe Province
SAVE LAIKIM: Pilai volibol, basketbol, stori na tok pilai, lukluk TV na go lotu.

NEM: Luxie Lucas
KRISMAS: 19 (man)
ADRES: Galai One Opic, P.O Kimbe, WNB
SAVE LAIKIM: Pilai soka, harim musik na mekim pren

NEM: Aidan Orari
KRISMAS: 28 (man)
ADRES: P.O Box 3435, Boroko, NCD
SAVE LAIKIM: Pilai gita, ritim buk, na raitim pas

NEM: Junior Eddie
KRISMAS: 20 (man)
ADRES: C/- P.O Box 521, Waigani, NCD.
SAVE LAIKIM: Pilai soka, ragbi, ritim baibel na go lotu

NEM: Luanne Akut
KRISMAS: 19 (meri)
ADRES: PO Box 102, Wewak, East Sepik Province
SAVE LAIKIM: Raitim pas, pilai basketbol, harim musik na ritim buk.

PMIZ inap kisim 30,000 manmeri long wok

PASIFIK Marin Industri Zon (PMIZ) inap long kisim 30,000 asples manmeri long wok.

Sampela inap wok stret long dispela bisnis senta na sampela bai kisim wok o mekim mani long liklik bisnis ol i mekim wantaim ol kampani long dispela senta.

Dispela em tok bilong Minista bilong Komes na Industri na Memba bilong Maprik, Gabriel Kapris, long taim ol asples manmeri i tok long pasim dispela senta.

Ol asples manmeri i tok gavman i no bin toktok gut wantaim ol long kamap bilong dispela senta na olsem em i mas pasim na stretim tok wantaim ol pas-taim.

Ol pipel long Bel, Madang **PMIZ I GUT NIUS:** Kapris askim ol manmeri long givim luksave.



Lagun em ol asples manmeri i tok planti samting gavman i no stretim tok wantaim ol bipo long em i tok long kamap bilong dispela senta.

Tasol Minista i tok ol pipel i no ken tingting planti bikos planti ol gutpela samting bai kamap long ol bihainim kamap bilong senta.

Em i tok long senta i kamapim inap olsem 30,000 wok i bikpela samting.

Em i tok moa olsem kamap bilong dispela senta tu i gutpela bikos em bai stap long planti yia i kam.

"Ol minarel bilong mipela i gat taim bilong ol long pinis tasol dispela senta bai stap long planti yia i kam.

"Olsem mipela i lukim long Mis-

ima Main we gol i pinis bihain long 20 yia.

"Kamap na stap bilong dispela senta i min mipela bai salim, pis i go aut long planti kantri.

"Bai gat dairekt flait i go long Siapan na atoriti bai mekim bikpela ples balus long Madang long mekim ol bikpela balus i go kam long em," Mista Kapris i tok.

Na em tok amamas tu long Nesenel Eksekutiv Kaunsil (NEC) long givim i tok orait long kamap bilong senta.

Dispela disisen i kamap long Septemba 30, 2009 we gavman i tok orait long K441 milion long kamap bilong dispela bisnis senta.

Dispela mani em gavman bilong Saina i helpim na givim.

Maski long kamap bilong LNG, pipel bai kisim taim yet: Saveman

Paul Zuvani i raitim

MASKI long kamap bilong bikpela Likwifaid Neteur Ges (LNG) projek planti manmeri bai kisim taim yet.

Inap long taim gavman i skelim na yusim gut mani em i kisim long dispela projek na ol arapela ges, petroleum na maining projek sindaun bilong manmeri bai i no inap gutpela.

Dispela i tok bilong Dokta Laurence Chandy bilong Lowy Institut long Australia.

Em i mekim dispela tok long Nesenel Risest Institut (NRI) long Mosbi long dispela taim gavman i tok Papua Niugini bai kisim gutpela mani long PNG LNG Projek.

Em i tok em i tru olsem 60 pesen bilong mani ol kampani long narapela kantri i save go aut na 40 pesen i stap bek.

Olsem long 10-pela samting, 7-pela i go aut na tripela i stap insait.

So maski Gavman na divelopa i tok dispela projek bai kamapim planti mani, planti bilong dispela ol mani i

no inap helpim sindaun bilong ol manmeri.

"Na long 30 pesen sapos Gavman i skelim gut dispela mani bai lukim stap bilong ol manmeri i kamap gutpela."

"Sapos nogat dispela 30 pesen bai go long liklik lain tasol na planti manmeri bai kisim taim nogut yet."

"Manmeri husat i gat sans long holim dispela mani bai skruim yet wok bilong kamapim moa kago na mani bilong em na liklik manmeri bai stap olsem tarangu," Dokta Chandy i tok.

Tasol sampela ol man olsem bipo Seketari bilong Foren Afeas, Gabriel Dusava, na bipo Vais Sansela bilong Yunivesiti bilong Papua Niugini, Joseph Sukwianomb, i tok ol toktok bilong Dokta i no tru.

Ol i tok PNG i lukim sampela gutpela senis pinis na i no tru olsem kantri i stap daunbilo tru long wok bilong developmen long mak bilong Yunaited Nesen.

"Toktok bilong mi i givim narapela hetpen long mi.

"Mi ting mi kamap orait tasol yu givim mi narapela

pen gen," Mista Dusava i tok.

Na Mista Sukwianomb i tok Dokta Chandy i mekim wok painim long ol laibreri na kompyuta tasol.

Em i no bin go aut tru long ol lokol ples long painim aut sapat ol pipel i stap long mak nogut.

"Mi laik save Dokta Chandy i go long Maramundi, Angugnak o Lek Kopiago."

"Mi laik tok olsem mi bin go na mi lukim ol manmeri i stap klina na i gro gut."

"Long yu kam na tokim mi olsem stap bilong mi i nogut em dispela mi no klia," Sukwianomb i tok.

Tasol Dokta Chandy i tok em i tokaut long PNG i stap tarangu yet maski long gutpela ron bilong kantri long wok bilong mani long 7-pela yia sindaun bilong kantri i nogut yet.

Em i tok dispela i no long sait bilong mani tasol moa long sait bilong infrastraksa em long ol rot, bris, ples balus, ol haus sik na skul.

Dispela ol samting i brukdaun yet, Dokta Chandy i tok.

Stap na wok wantaim manmeri gat HIV

BISNIS Kolisan Egensim HIV na AIDS (BAHA) i praivet grup i go pas long praivet sekta, ol wokman bilong ol na famili bilong ol long paitagensim sik HIV na AIDS long dispela taim.

Wok bilong BAHA i kisim wantaim pasin bilong toktok long ol stori bilong HIV na AIDS na long rot bilong tokaut long dispela sik long ol nius samting olsem redio, pepa na televisen.

Na yusim dispela ol samting bilong nius i save helpim gut wok bilong tokaut long dispela sik.

Kain samting i save kirapim bel na tingting bilong ol manmeri long sindaun na paitim toktok long wanem samting ol bai mekim long abrusim dispela sik.

Wok bilong midia i save kirapim bel bilong gavman, ol dona ejensi na narapela ol lain long wanem samting ol bai mas mekim long stretim dispela ol hevi.

Long painim aut moa long strong bilong midia long wanem samting i save kamap bikos long wok bilong nius, BAHA i mekim wok painim long tupela niuspepa long ripot bilong tupela long las tupela (2) yia ol i ripot

long HIV na AIDS.

Nesenel Risets Institut (NRI) i givim K10,000 long BAHA long mekim dispela wok painim.

Na wantaim dispela BAHA i billip olsem dispela bai givim sans long pablik long ol i kamaut na mekim ol toktok long paitagensim HIV/AIDS.

Olgeta manmeri i kisim gutpela taim taim gutpela na stretpela toktok i kamap.

Long dispela mun BAHA i lukluk long tokaut moa long ol gutpela stori na wanem ol samting ol bai mekim.

BAHA i mekim wok painim long Pos-Kuria na Nesenel niuspepa long tupela yia (2005 i go inap long 2007) long ol ripot ol i mekim long HIV/AIDS.

Long dispela wok painim ol i painim olsem:

- TUPELA niuspepa i mekim bikpela namba bilong ripot;
- NAMEL long 2005 na 2007 tupela niuspepa i mekim inap olsem 1808 stori, editorial na pas long sik HIV na AIDS;
- LONG Papua Niugini pepa i wanpela tasol i nius we i ken mekim planti manmeri i kisim

gut toksave long HIV na AIDS;

- HAP bilong dispela namba bilong ol stori i kamap em ol ausait lain i raitim. I no ol ripota bilong Pos-Kuria o Nesenel niuspepa;

- LONG dispela ol stori 87 pesen (%) i toktok long sik i stap long PNG na tri (3) pesen i toktok long sik i stap long Pasifik;

- 53 pesen stori i toktok long awenes na rot bilong abrusim HIV na AIDS na

- STORI bilong ol manmeri i kisim skul long paitagensim HIV na AIDS.

BAHA i tok HIV na AIDS yet i no save kilim manmeri.

Em i bagarapim tasol banis i save was long manmeri long narapela sik i no kamap na baragapim ol.

Taim dispela banis i bagarap, narapela sik i go insait isi na kilim manmeri i dai.

Long dispela as BAHA i tok stap bilong HIV na AIDS i sans bilong manmeri i kisim bagarap long sik Kolera na Sisenri nau, i wok long kamap long kantri, moa long hap bilong Morobe Provins.

Giaman pasin bagarapim wok bisnis

Paul Zuvani i raitim

GIAMAN pasin bilong yusim save na samting bilong narapela man olsem bilong yu yet i save daunim wok bisnis long kantri.

Na i kamap long mak we gavman nau bai painim hat long daunim hariap.

Wanpela piksa bilong kain pasin olsem em ol su, beg o snot bilong naik (nike) o adidas bilong ol Amerika kampani em ol kampani bilong narapela kantri i save hait na kisim piksa bilong dispela ol samting na putim long giaman samting olsem su o snot tru na salim olsem trupela naik o adidas bilong Amerika.

O ol tumbuna o pilai gita singsing bilong wanpela grup o man em ol narapela bai yusim long singsing, rekot na kisim mani long em.

Dispela kain pasin em stil pasin na i agensim lo bilong Intelektuel Propeti Rait (IPR). IPR i stap bilong banisim save o samting yu mekim long tingting bilong yu na narapela manmeri i no ken kisim, paulim o stilim na yusim long kisim mani long em.

Dispela em toktok bilong Menesing Dairekta bilong Invesmen Promosen Atoriti Ivan Pomaleu long kibung bilong ol memba kantri bilong komiti bilong ol kantri husat i pait egens long dispela hevi (Intelektuel Propati Rait- IPR).

Mista Pomaleu i makim maus bilong Minista bilong Komas na Industri na givim tok long wanpela bisnis kibung long Jiniva (Geneva) i no longtaim i go pinis.

Em i tok dispela hevi nau i go long ol kaikai na planti ol arapela samting na i givim bikpela hevi long

ol manmeri long kisim gutpela sevis long mak bilong mani ol i baim ol samting.

"Kamap bilong ol giaman samting nau i stap long planti hap bilong Pasifik rijen.

"Long dispela taim kain pasin em i bagarapim wok na stap bilong ol bisnis haus na ol manmeri husat i baim ol samting.

"Kain pasin i bikpela wari bilong Papua Niugini.

"Olgeta memba kantri long rijen nau i bungim kain pasin nogut," Pomaleu i tok.

Em i tok bikos long dispela ol gavman na atoriti long rijen i mas sanapim ol strongpela lo na pait egensim dispela pasin nogut.

Em i askim kibung (asembli) long givim gutpela sapat bai ol i daunim dispela giaman wok na bisnis.

Sapos wok bisnis na sindaun bi-

long komyuniti inap bagarap.

"Em wok bilong wanpela ol gavman long Pasifik Ailan rijen long givim gutpela luksave na stretim dispela hevi hariap."

"Na dispela i ken kamap gut sapos ol gavman i kamapim ol lo na strongim ol polisi we dispela i ken helpim ol polis long karimaut gut lo na long ol manmeri i sindaun gut."

Pomaleu i tok Australia long sait bilong em i helpim wantaim WIPO na Pasifik Ailan Forum Sekretariat long wok klostu wantaim Pasifik Ailan kantri long las 6-pela yia.

Em i tok em i klia long ol kibung mipela i bin holim olsem ol liklik pasifik ailan kantri i nogat gutpela ol opis na wokman long karimaut lo na stretim dispela ol hevi.

Moa long dispela sais bilong maket, bilong sampela ol ailan

kantri i no bikpela na olsem i nogat bikpela wari long opis bilong intelektual propati rait lo i kamap.

Bikos long dispela ol liklik ailan kantri i long rijen i bung wantaim na i laik kamapim IPR opis long wanpela kantri.

Dispela i lukim ol i makim PNG olsem hetopis bilong Intelektuel Propati Rait.

Pomaleu i tokaut tu olsem Papua Niugini i wanpela ailan kantri husat i traim hat long pait egensim dispela pasin nogut.

"Papua Niugini wantaim ol arapela pasifik ailan kantri i gat ol kastom na kalsa bilong ol na i no gutpela ol manmeri long narapela kantri i kam stilim pasin na save bilong ol na kamapim ol samting bilong helpim ol yet."

Kainantu JDP&BPC putim K2.5 milien long agrikalsa developmen

James Kila i raitim

KAINANTU taun maket long lalen Haians provins i wok long helpim naisnela ol fres gaden kaikai i pany streti na long gutpela taim.

Dispela mani helpim bai go long helpim ol kopi fama long stretim gen ol kopi gaden bilong ol na tu helpim ol frut na fres gaden kaikai fama na tu ol lain lukautim pik, kaun, kakaruk o laipstok long gohet long kirapim ol nupela projek insait long distrik.

Mani mak osem K500,000 em ol yusim baim long helpim ol rurel famas husat long distrik, na K2-milien sapot yet long gohet long sapotim ngremi en bihar.

Olgeta distribe ol projek we i baim helpim ol rurel long dispela mani mak osem bilong ol rurel na pis long distrik insait long distrik ol projek na nupela long Opai bilong Rural Developmen (CRD) na Naisnela Agrikalsa Developmen Plan (NADP).

Ripot Wantok Niuspepa i kisim i tokaut olsem wanpela menesmen kampani bai ol i makim long kari-maut wok na menesim ol progrem wantaim helpim i go long dispela K2-milien we i stap long helpim agrikalsa sekta insait long distrik.

Kainantu distrik agrikalsa projek opisa, Rinden Keri i tok olsem wanem mani-helpim ol i kisim bai go long helpim ol rurel famas husat i laik statim ol nupela agrikalsa projek long ples bilong ol na tu ol famas husat i laik kirapim bek o stretim ol projek nau i stap yet tasol nidim sapot.

Long ol nupela projek mani bai go long helpim long baim ol samting long kirapim ol projek.

Wanem wok developim o sapot long agrikalsa bai bihainim kain bilong bilong Smolholda Sapot Sevises Pilot Projek (SSSPP). Dispela i min olsem ol fama ol i



GUTPELA MAKET: Ol mama bilong ples long salim ol fres gaden kaikai long Kainantu maket

go long helpim ol rurel famas husat i laik statim ol nupela agrikalsa projek long ples bilong ol na tu ol famas husat i laik kirapim bek o stretim ol projek nau i stap yet tasol nidim sapot.

Long ol nupela projek mani bai

go long helpim long baim ol samting long kirapim ol projek.

Wanem wok developim o sapot long agrikalsa bai bihainim kain bilong bilong Smolholda Sapot Sevises Pilot Projek (SSSPP). Dispela i min olsem ol fama ol i

makim long en bai go insait long sampela trening long sait long kamapim wok na tu long sait bilong fainensal menesmen long ol samting ol i kisim na wanem i ken kamap na go het.

Dispela i min olsem ol fama ol i

NO. 1 IN SAFETY

BISHOP BROTHERS
everything for industry...

EMAIL: sales@bishopbros.com.pg WEBSITE: www.bishopbros.com.pg

Manus ailan komyuniti strongim self-helpim tingting

Soldier Buruka (DAL) i raitim

OL manmeri bilong M'buke ailan long Manus provins i kisim tok amamas long gutpela wok ol i mekim.

Dispela luksave i kamap long taim ol opisa bilong Dipatmen bilong Agrikalsa na Laipstok (DAL) na PNG Sasteni-bal Developmen Progrem (PNGSDP) i givim helpim long ol.

Las wik long makim maus bilong DAL sekretari Anton Benjamin fud sekyuriti diarekta Brown Konabe i lonsim sola pawa pam bilong wara we i kos K30,000 na PNGSDP i tok promis long givim K18,000 long ol i groim kain kaikai we i ken sapotim ol olgeta taim.

Long dispela taim tu DAL Mamose Rijen Dairekta Masayan Moat i lonsim kokonas riplenting progrem.

Dispela mani em bilong helpim ol manmeri bilong ailan long planim ol kaikai we i ken stap long taim bilong san.

Ol ailan manmeri tu i bungim hevi bilong solap bilong solwara long graun bilong ol na dis-

pela bai sotim graun bilong ol long stap na mekim gaden.

Dispela helpim i kamap bihain long ol manmeri i kamapim M'buke Ailan Pipel Asosiesen (MIPA) long mekim ol wok na sapotim ol yet.

Long dispela asosiesen ol i kamapim ol fan o mani long mekim helt, fud sekyuriti, konsevesin, kalsa na edukesin projek.

DAL Niugini Ailan Rijen Dairekta Tom Peni i tok M'buke komyuniti i soim hatwok na bikos long dispela helpim bai go long ol.

Go wantaim DAL na PNGSDP em Wol Waid Faundesin (WWF) we ol i skulim ol manmeri long ol samting ol i mas kamapim long redim ol long ol taim nogut.

M'buke ailan i gat 13 atol wantaim 1000 manmeri na i stap 98 kilo mita longwe long bikpela Manus ailan. Em save kisim moa long tripela aua long kisim spit bot long Manus ailan na go long M'buke ailan.

Narapela ol samting i kamap long wokabaut em long lonsing bilong strongim agrikalsa

teknoloji projek we NARI i go pas long ol.

Dispela em long stretim na kamapim eid pos, tu stori klasrum, tupela austriga kanu na skolasip fan.

Dispela ol projek em PNGSDP bai givim helpim.

Planti bilong ol manmeri long ailan i save stap long strong bilong pis we ol i save salim long maket long bikpela Manus long baim kaikai bilong ol.

Tasol wantaim kain helpim dispela bai strongim ol moa yet long stap bilong ol.

Long progrem bilong planim gen ol kokonas viles sif Luke Polangu i tok dispela i gutpela long wanem ol i wet longtaim long kisim kain helpim olsem inap long dispela taim ol opisa i go kamap.

Em i tok tenkyu long ol arapela manmeri bilong M'buke ailan husat i stap long narapela hap long sapot ol i mekim long tokaut long laik ol i gat long ples.

Dokta Neil Stronach bilong WWF i kamap tu long lukim lonsing bilong dispela ol progrem na projek.



BUNG GEN: Johns na Tahu i pilai long wanpela trening bipo. Tupela i stretim tok na bai wokbung gen.

Johns na Tahu stretim tok

ANDREW Johns na Timana Tahu i stretim tok pinis na tupela i lukluk long wokbung gen long nambawan gem bilong ol.

Sosol jastis komisina bilong Aboriginal na Tores Strait ailan, Mick Gooda i tokaut long dispela bihain long dispela tupela man i bung long Mande nait dispela wik.

Dispela em i namba wan taim tupela i bung bihain long Tahu i kros na lusim Blues kem long Jun 11 taim em i no amamas long wanpela toktok bilong Johns we i bagarapim Maroons senta, Greg

Inglis olsem wanpela bilak skin man.

Hevi bilong tupela i kamap bipo tasol long ol i pilai namba tu State Of Origin gem agensim ol Maroons long Brisbane.

Gooda, husat i bin stap namel long tupela taim ol i bung i tok tupela wantaim nau i laik wokbung long rausim dispela pasin bilong bagarapim ol manmeri husat i gat narapela kain bilong skin.

"Tupela wantaim i laikim ol komyuniti save long as tru bilong dispela kain pasin na wanem samt-

ing i save kamapim na ol bai wokbung long helim ol manmeri long daunim," Gooda i tok long wanpela setmen pepa.

Em i tok tupela i luksave tu olsem toktok bilong Johns i mekim na ol famili bilong tupela tu i pilim nogut wantaim.

Em i bagarapim tu gutpela wok na pilai bilong ol insait long gem we ol i save laikim tru - ragbi lig.

"Nau tupela i laik putim dispela long baksait na lukluk i go fowet long mekim planti moa gutpela wok wantaim," Gooda i tok.

Gem bilong Eels i go we?

BIKNEM mausman bilong ragbi lig na tu bipo Australia hap bek, Peter Sterling i bilip Parramatta bai pilai gut moa sapos ol i senisim ol hap bek na faiv eit bilong ol.

Sterling i tok, long wankain taim long 2009, ol Eels i wok long pilai gut na winim ol gem bilong ol we i lukim ol i go insait long gren fain-ols.

Tasol dispela wankain paia i no lait moa long gem bilong ol.

"Bihain long lus bilong ol agensim Brisbane las wik mi ting kosa, Daniel Anderson bai sutim tok long nambawan pilaia bilong em, Jarryd Hayne tasol i gutpela olsem em i no mekim dispela," Sterling i tok.

Em i tok nogat wanpela kosa i mas putim hevi bilong tim long wanpela pilaia tasol.

"Bikpela hevi bilong ol Eels nau em ol i no inap long putim trai," Sterling i tok.

"Daniel (Anderson) i wok long toktok long ol asua bilong ol, wanem samtung ol i mas mekim long putim presas long ol arapela

tim na tu long pinisim ol set bilong ol.

"Bihain long 16 raun, namba bilong ol trai ol Eels i putim i aninit long olgeta narapela tim," em i tok.

Ol ripot i soim tu olsem ol Eels i stap namba tu long resis long gutpela difens bilong ol na sapos ol i pilai gut bai ol inap stap long namba 4 ples nau.

Tasol ol i wok long painim hat long skoa.

"Mi ting bikpela ples ol i mas mekim senis long helpim ol em long ol hap bek na faiv eit bilong ol.

"Nau yet nambawan hap bek insait long klap em yangpela Tom Humble," Sterling i tok.

Sterling i tok Humble i pilai 5-pela gem tasol long sinia gred inap 268 minit olgeta tasol em i soim inap save na stail long pilaim dispela posisen.

"Em i gutpela pilaia na i save tromoi ol gutpela bal tru," Sterling i tok.

Em i tok tu olsem gutpela faiv eit

bilong klap em Kris Keating.

"Mi ting em i save westim taim long pilai dami hap, em bai gutpela moa sapos em i pilai faiv eit," Sterling i tok.

"Em i gat gutpela spit na i ken go insait na kam autsait hariap tru long mekim spes bilong ron."

Tasol sapos Keating i pilai faiv eit bai ol i mekim wanem long Daniel Mortimer husat i holim dispela posisen nau?

"Nau yet em i gutpela sapot pilaia na i mas stap tasol em i man we mi bai putim long pilai dami hap sapos mi kosa," Sterling i tok.

Dispela em wanpela bikpela eria we Sterling i bilip bai helpim gem bilong ol Eels.

Narapela em long ol i mas gutpela kik insait long gem.

Em i bilip ol i gat sans yet sapos ol i ken stretim dispela hariap na stat long winim ol gem bilong ol gen.


"Ol i gat ol gutpela pilaia i stap tasol i mas yusim ol gut long winim ol gem bilong ol," em i tok.

NRL SPOTS DRO RAUN 17 JULAI 2-5 2010

Gems bilong dispela wik




Harvey Norman State of Origin - Game III: July 7.



Raun 16 - Poins Leda

TIM	W	L	D	B	Pts
1 Dragons	12	3	0	1	26
2 Panthers	10	4	0	2	24
3 Tigers	8	6	0	2	20
4 Titans	9	6	0	1	20
5 Rabbitohs	8	7	0	1	18
6 Broncos	8	7	0	1	18
7 S/Eagles	8	7	0	1	18
8 Roosters	7	7	0	2	18
9 Warriors	7	7	0	2	18
10 Eels	6	8	0	2	16
11 Knights	6	9	0	1	14
12 Raiders	5	9	0	2	14
13 Sharks	5	9	0	2	14
14 Bulldogs	4	10	0	2	12
15 Cowboys	4	11	0	1	10
16 Storm*	9	6	0	1	0

* NRL i rausim olgeta poin bilong Melbourne Storm long dispela via.



KAM: Bobby Mori bilong Vipers i redi long bungim banis bilong ol Bombers long bemoibile kap pilai bilong ol long Mosbi las wik Sande. Vipers i win 20-10. **POTO:** Nicky Bernard.

PAITIM: Moses Arie bilong Hoppers i putim bal i go antap long NCD volibol primia divisen gem bilong ol agensim U-mi Yet las wik Sarere long Mosbi. **POTO:** Andrew Molen.

Spots dro

Port Moresby Rugby Football Union. Wik 13 Dro.

Sarere Julai 3, 2010.

Pilai Graun 1

9.00am	U20	Chiefs	vs.	University
10.20am	B	Chiefs	vs.	University
11.40am	B	Royals	vs.	Harlequins
1.00pm	A	Royals	vs.	Harlequins
2.20pm	A	Chiefs	vs.	University
3.50pm	Primia	Royals	vs.	Harlequins

Pilai Graun 2

9.00am	U20	Royals	vs.	Harlequins
10.20am	U20	Wanderers	vs.	Brothers
11.40am	B	Wanderers	vs.	Brothers
12.50pm	Meri	Defence	vs.	Sisters
2.20pm	A	Wanderers	vs.	Brothers
3.50pm	Primia	Wanderers	vs.	Brothers

Sande Julai 4, 2010

Pilai Graun 1.

9.00am	U20	Hunters	vs.	Kone
10.20pm	B	Hunters	vs.	Kone
11.40pm	Meri	Royals	vs.	Harlequins
12.50pm	A	Hunters	vs.	Kone
2.20pm	Primia	Chiefs	vs.	University
3.50pm	Primia	Hunters	vs.	Kone

Pilai Graun 2.

10.00am	U20	Defence	vs.	Lasalians
11.20pm	B	Defence	vs.	Lasalians
12.40pm	Meri	University	vs.	Lasalians
1.50pm	A	Defence	vs.	Lasalians
3.20pm	Primia	Defence	vs.	Lasalians

Bai: Wanderers (Meri).

TOKSAVE: Salim ol spots dro bilong yu kam long Feks; 325 2579, e-mel: amolen@wantok.com.pg o kam lusim long Wantok Nius-pepa opis long Central Waigani, NCD.



TRAIPELA MAN: Ol dispela Wanderers pilaia i traim hat long daunim bikpela fowet bilong University Piggies, Maino Veve Mosbi ragbi union primia divisen las wik Sarere long Bava Park. **POTO:** Andrew Molen.

TOK PILAI: Mista Brown (Iephan), Watete na Copper em tripela pani man husat i save kamap long mekim ol manmeri lap. Las wik Sande ol i mekim nais gen long hap taim bilong bemoibile kap resis long Mosbi na ol manmeri no isi long lap tu. **POTO:** Nicky Bernard.

Spain daunim Portugal



YES YAH: Villa i amamas bihain long gol bilong em

GOL bilong David Villa i givim sans long Spain long winim Portugal 1-0 na go insait long kwata fainols bilong wol kap resis long Saut Afrika.

Villa i skoa long namba 63 minit bilong gem bihain long sampela gutpela pilai we ol Portugal i painim hat long stopim.

Portugal i wok long kam bek strong tasol Spain i gat moa sans long skoa na i no long taim Villa i kisim kaikai bilong hatwok bilong em.

Villa i kik namba wan taim tasol goli pasim na Villa i kikim gen i go abrusim het bilong goli gen long skoa.

"Mipela i bilip mipela inap long win tasol mipela i kisim was tu bilong wanem ol samting i ken senis

hariap tru," kdsa bilong Spain, Vicente del Bosque i tok bihain long gem.

"Mipela i save mipela i wok long wok gut olsem na mipela i laik mekim liklik histri bilong mipela tu," em i tok.

Kosa bilong Portugal, Carlos Queiroz i amamasim Spain long win bilong ol tasol i no amamas long ol sans tim bilong em i abrusim.

"Ol i ronim gut bal, mipela i wok long bekim i kam tasol bihain long ol i abrus," em i tok.

"Mipela i gat sans tasol i no skoa.

"Mipela i soim strongpela tingting long pilai na win tasol em i no kamap olsem na mipela bai mas kam bek strong bihain taim," Queiroz i tok.

Nogat bekim long Lam

■ Ikam long pes 28

Em i tok dispela kros pait insait long PNGRFL i mekim na nogat planti samting i kamap redi bilong Four Nations na ol arapela tonamen tu long PNG na ovasis.

Sir John Dawanicura bilong PNGSFOC i tok dispela ol ain husat i kros i stap i tingim ol yet na i no wari long gem na ol pilai.

Nau yet i nogat tok-tok i kam long Lam sapos em bai bihainim toktok bilong em na risain tasol ragbi lig long PNG i stap long taim nogut nau.

Cook ailans husat ol i pinis namba tu ples long Pacific Cup salens las yia i stap redi long kisim ples bilong PNG long Four Nations.

Ol Sepik strongim 'Ironman' resis

SEPIK Ironman (ainman) resis em wanpela bikpela pilai we i save kamap long Wewak taun olgeta yia.

Nau ol bisnis haus long hap i givim sapot bilong ol tu long dispela resis we i save bungim olgeta manmeri long taun wantaim.

Long wanpela bung las wik long helpim mekim mani bilong ronim dispela pilai, komiti kamapim K250, 000 i kam long ol spona.

Namel long ol lain i kamap long givim sapot em PNG praim minista, Gren Sif Sir Michael Somare.

Sir Michael i givim K10, 000 na i tok promis long givim narapela K20, 000 bihain.

Em i baim sampela samting i go inap long K20, 000.


Tasol em i amamas moa long lukim ol bisnis haus insait long Wewak i kamap long givim sapot bilong ol.

"Dispela em namba wan taim bilong mi long lukim ol manmeri na ol liklik bisnis bilong Wewak i bung wantaim long kamapim dispela kain mani mak long ronim dispela resis," Sir Michael i tok.

Em i tok bipo ol i save go mekim kain bung long Mosbi long kamapim kain mani olsem.

"Nau mi amamas long lukim yupela ol manmeri bilong Sepik yet i kam bung long mekim dispela.

"Mi amamas tru long yupela, sapos yumi ken sapotim planti moa kain pilai olsem bai Is Sepik



SAPOT: Sir Michael i amamasim ol spona bilong Sepik Ironman resis long Wewak. FOTO: Rodney Kamus.

i ken kamap wanpela bikpela ples bilong pilai spot insait long kantri," Sir Michael i tok.

Em i tok Wewak i gat wanpela gutpela pilai graun i sanap pinis na em i ken pulim planti moa gutpela na bikpela pilai kam wantaim moa gutpela sapot olsem.

Sir Michael i amamas tu long wok bilong Sepik Ironman long

helpim ol i save givim i go long Wewak jenerel haus sik, i save strongim pasin bilong kamapim gutpela pilai, apim nem bilong taun na tu pulim moa turis i kam.


Sir Michael i baim tu sampela wilwil bilong yusim insait long resis.

Dispela bai namba 8 yia bilong resis na 80 tim i givim nem pinis

long stap insait long en.

Provinsol gavman tu i givim K20, 000 na i tok promis olsem wanwan memba insait long provins bai givim K10, 000.

Tonamen i save kamap long bonde bilong Kwin long Jun olgeta yia tasol dispela yia ol i surukim i go long independens wiken long Septemba.



HEVI: Blues bai kisim Tahu long tim gen tasol ol i wari olsem sampela pilaia bai kros long em yet.

Ol Blues pilaia no amamas long Tahu

PLANTI ol NSW-Blues pilaia i no laikim Timana Tahu-i kam bek long tim long gem namba tri.

Tasol ol selekta i no laik ol manmeri ting ol tu i gat bel-hevi long em sapos ol i no kisim em.

I gat bilip olsem Tahu bai nap long winim ples bilong em gen insait long Blues tim na bai kisim ples bilong Joel Monaghan.

Tasol tim i wari tu olsem nogut sampela pilaia bai no inap amamas long em bilong wanem ol i kros long em yet long lusim ol long gem namba tu.

NSW Rugby League bosman, Geoff Carr i tok ol bai amamas long lukim Tahu i kam bek insait long tim tasol em i wok long kosa Greg Bellamy na ol selekta, Bob Fulton, Laurie Daley, Geoff Gerard na Bob McCarthy.

"Sapos NSW i no kisim em gen bai ol manmeri ting olsem ol Blues em ol lain husat i no save laikim ol manmeri bilong arapela ples (racist)," wanpela mausman bilong Blues i tok.

"Em i bikipela hevi bilong tim nau bilong wanem sampela pilaia i no amamas olsem em i no toktok long ol ol long Joey (Andrew Johns) na i lusim tim tasol.

"Ol i pilim olsem em i daunim ol," em i tok.

Carr i tok nem bilong Tahu bai stap insait long skwat yet taim ol i mekim seleksen.

"Timana i mekim dispela pasin bihainim wanem samting em i bilip long en, mipela i gat respek long dispela olsem na mipela bai lukluk long kisim em long tim gen bilong gem tri," em i tok.

NRL laikim Bolt resis wantaim ol NRL pilaia

WANPELA resis bai kamap namel long olgeta spitman insait long NRL na ol lain i kamapim dispela resis i laikim Usain Bolt i kam ron wantaim ol.

Bolt em man husat i holim rekot olsem nambawan spitman insait long wol.

Em i gat wol rekot long 100 na 200 mita resis.

Dispela resis bilong NRL bai kamap long Olympic Park long Melbourne long mun Septemba na ol i go pas long kamapim dispela resis i wok long toktok wantaim ol lain bilong Bolt.

Bolt, bilong Jamaica, i no resis yet insait long Australia na dispela bai gutpela sans long kisim wanpela nambawan spotsman bilong wol i kam pilai.

Sapos em i kam, Bolt husat 100 mita rekot bilong em i sanap long 9.58 sekens, bai resis wantaim ol pilaia olsem Jarryd Hayne, Greg Inglis, Billy Slater na Michael Jennings.

"Em wanpela biknem man long dispela spot na mi save laik lukim em i pilai.

"Sapos mi no pilai lig

em bai mi nap pilai spot bilong em tu," Hayne i tok.

"Em bai gutpela tru sapos mi bungim em na em bai gutpela tru long tingim bek olsem mi bin resis wantaim Usain bolt.

"I nogat planti man bai lukluk i kam bek bihain na stori long ol tumbuna bilong ol olsem em i bin resis wantaim Usain Bolt," em i tok.


Taim dispela resis i kamap tu bai ol i lukim husat tru em spitman tru insait long NRL.

Dairekta bilong ol lain i go pas long kamapim dispela resis, Hayden Knowles i tok ol toktok bilong ol wantaim menesa bilong Bolt i kamap orait tasol.

"Em i gat wanpela gutpela menesa husat i lukautim em long taim na i save was long em olsem famili bilong em na mi amamas long dispela.

"Ol toktok namel long mipela i go orait tasol," Knowles i tok.

Em i tok ol i laik kamapim wanpela gutpela pilai tru long dispela nait olsem na ol bai amamas sapos ol i ken kisim Usain Bolt i kam.



SPITMAN: NRL i laik kisim Bolt i kam resis wantaim ol pilaia bilong ol.

Ol arapela pilai ol i laik mekim tu long dispela nait bai lukim ol music ben, danis na ol manmeri bilong Australia tu bai gat

sans long amamasim ol arapela spotsmanmeri bilong ol husat bai go long Commonwealth Games long India.

Kohu soim kala long win bilong Vipers

HANUABADA 'mero', Toua Kohu i smail na lap isi tasol taim ol i kolim nem bilong em olsem nambawan pilaia tru ol i makim long gem bilong ol Stop 'N' Shop Vipers las wik agensim Wantok Gaming Board Mt Hagen Kuris.

Ol i bin winim Kuris 32-14.

Las wik, Kohu i kamapim wanpela strongpela pilai gen long helpim tim bilong em i win gen agensim Bombers bilong Lae.

Dispela huka i pilai gut tru long helpim Vipers i bagarapim sindaun bilong Kuris 32-14 long wik bipo na gen long las wik agensim Bombers.

Kohu i bin putim tupela gutpela trai tu agensim Kuris, na las wik em i givim hat taim long difens bilong ol Bombers.

Las trai bilong em i hatim tru bel bilong ol Kuris pilaia na sapota na sampela i tromoi stik, plastik na ol arapela samting i go long fil.

Tasol dispela stail mangi bilong bikipela ples i smail na wokabaut isi tasol i go.

Kohu i no nupela man long gem.

Kain stail pilai bilong em wantaim narapela wantok bilong em bilong Hawks klab long Mosbi ragbi lig i bin soim kala bilong ol na winim lewa bilong ol lain long Toyota Mioks taim ol i kisim ol long go pilai tupela yia long hap.


Tasol pastaim long en, Kohu i bin pilai wantaim Monier Broncos, wanpela olupela tim bilong Mosbi long bipo SP Cup resis.

Kain gem bilong em long ronim bal long dami-hap eria na lukluk nabaut na trik na setim bal long ol fowet i save paulim ol narapela pilaia tu.

Gem bilong em isi tasol na em i no save belhat ol mekim nogut long ol arapela pilaia.

Yes, kain ol pilaia olsem Kohu husat i save yusim tingting long pilai tasol na kamapim ol sans long ol fowet na beklain long putim trai em i mas gat planti moa long PNG.

STRONGIM TIM: Kohu em wanpela gutpela pilaia bilong Vipers. FOTO: Nicky Bernard.



SPOT RAUN

WANTAIM

Scott Vavine, ML



Yusim spots long mekim samting

PLANTI manmeri save lukim spots olsem samting bilong bung wantaim long pilai na amamas tasol.

Hia long PNG, yumi save lukim olsem spots i save bungim kain kain manmeri wantaim long olgeta komyuniti.

Dispela i no save pinis, long wanwan komyuniti bai gat wanpela kain pilai na olgeta taim bai gat planti kamap long dispela ol pilai.

Longpela taim nau spots i kamap olsem wanpela bikpela samting long laip bilong ol manmeri long hia.

Em i save kamap planti senis long laip bilong ol tu.

Planti taim yumi save yusim spots long amamas bilong yumi tasol.

Wanpela samting ol spots ogenaisesen na asosiesen i ken askim ol yet em; "Bai yumi yusim spots olsem wanem long senisim na tu helpim laip bilong ol manmeri long komyuniti?"

Longpela taim nau yumi amamas nating long spot tasol yumi no save tingting long ol arapela samting spots i ken helpim yumi long en.

Nau yumi mas luksave long wanem samting spots i ken mekim long senis laip bilong yumi na i no long pilai graun tasol.

Taim yumi luksave long strong bilong spots, yumi bai nap tu long makim ol gutpela samting em i ken kamap na yumi ken wok long dispela ol samting insait long komyuniti.

Dispela kain wok bai kamap insait long ol komyuniti spots ogenaisesen bilong yumi olsem ol tim, klap na asosiesen, maski ol i bikpela o liklik.

Ol lida bilong dispela ol grup i mas namba wan lain long soim dispela ol wok na senis we inap kamap.

Dispela ol lain tu i mas gat gutpela save na tingting long mekim dispela wok.

Tingim, spots bai nogat as bilong en sapos ol lain husat i go pas long ronim i nogat gutpela save long mekim dispela wok.

Dispela ol lida i mas soim ol stretpela pasin we spots i lainim ol bai dispela ol pasin i kalap i go long ol arapela tu.

Ol samting spots i ken lainim ol em olsem pasin bilong wokbung olsem tim, noken wari long kala bilong skin, tokples, asples bilong em, bikpela bilong em, lotu o save bilong em skul na tu sapos em i man o meri na planti arapela samting.

Pasin bilong soim respek o givim luksave long arapela tu bai kamap na bai mekim ol arapela tu i soim respek long yu.

Yu mas save gut long ol-hevi bilong komyuniti na yusim spots long helpim yu long daunim ol dispela hevi.

Ol dispela spots grup i mas go pas long mekim ol kain wok long traim na daunim ol dispela hevi.

Taim ol i mekim dispela kain wok bai ol manmeri lukim olsem ol spots grup bilong ol i gat tingting long lukautim komyuniti bilong ol tu.

Dispela i soim tu respek bilong ol dispela spots lain long komyuniti bilong ol na tu long ol arapela manmeri husat i save stap long hap.

Ol samting mi toktok long en antap em sampela ol samting we ol spots grup i mas go pas long mekim insait long ol komyuniti bilong ol.

Dispela bai helpim long kamapim gutpela sindaun na tu lukautim ol yangpela manmeri stap gut.

Olgeta spots grup i mas soim pasin bilong lukautim ples na komyuniti wantaim ol manmeri bilong ol we ol i stap wantaim.

Na long pinisim toktok, mi laik singaut gen long olgeta spots grup long go pas long mekim kain wok.

Pilai bilong Stone, Wisil na Dell soim ol i redi long Commonwealth Games


STRONGPELA pilai bilong Toea Wisil, Nelson Stone na Salome Dell long Esia (Asia) long namba wan hap bilong dispela mun i pulim ai bilong planti olsem ol bai kamapim wankain resis long Commonwealth Games resis long Ogas.

Ol meri ron gut long 4x100m na 4x400m rile resis na i gat sans long ol i apim mak bilong ol moa yet bihain long dispela yia.

Wisil na Dell tu i stap long gutpela mak bilong pilai na long wankain taim PNG Athletics Union (PNGAU) i amamas long pilai bilong Betty Burua na tu long kam bek bilong Mae Koime.

Helen Philemon tu husat i makim PNG namba wan taim tru long Pacific School Games long 1996 i soim kala bilong em wantaim wanpela gutpela ron long 100m resis na rile.

4x100 rile tim bilong ol man tu i mekim gut long



RON GUT: Wisil i stap long gutpela fom long strong PNG long resis bilong ol meri.

dispela resis we i kamap long India.

Kevin Kapmatana i bin kisim bagarap na i no pilai long dispela we i lukim tu 4x400m tim i painim hat liklik tasol PNGAU i bilip em bai redi long kam bek long Oktoba.

Ol i bilip Kapmatana bai

holim PNG long 800 mita resis na Dell bai holim tim long wankain resis bilong ol meri.

Sapalai Yao bai wanpela tasol husat i makim PNG long resis longpela rot.

Tasol ol bai lukluk long pilai bilong em long Gold Coast Half Marathon na

PNG nesenel sempionsip long Julai bipo ol i kisim em long skwat.

Yao i no bin gat sans long trening ovasis bilong wanem em i bin stap long skul na nau em i wok tisa long Simbu na i nogat inap taim.


"Tasol em i gat sans yet bihain long em i kamapim gutpela pilai long sampela resis long Lae i no long tai mi go pinis," PNGAU it ok long wanpela stetmen pepa.

Long ol arapela pilai bai lukim Mong Tavol na Norman T'se tasol i stap insait.

Tavol i winim ples long skwat bilong "Triple Jump" resis bihain long em i brukim PNG nesenel rekot long Me, we i sanap 36 yia.

PNGAU bai tokaut long laspela tim bilong go long Commonwealth Games bihain long nesenel sempionsip long Lae long Julai 9 i go long 11.

REKOT: Stone em nambawan man long PNG long ron aninit long 33 seken mak insait long 300 mita resis. WANTOK POTO.



Stone putim nupela rekot

NELSON Stone i putim wanpela nupela 300 mita rekot bilong PNG las wik Sarere long University bilong Queensland long Australia.

Em i brukim mak bilong Subul Babo husat i putim 34.26 sekens long wanpela resis bipo long 1991 SP Gems long Mosbi.

Stone nau i putim nupela taim long 33.99 sekens.

Dispela 300 mita resis i no save kamap tumas.

Planti taim ol i save kamapim dispela resis long redim ol etlit long ol bikpela pilai we bai kamap bihain.

Geoffrey Bai na Peter Pulu i bin ronim dispela resis long 33.9 sekens tasol ol i bin kisim taim bilong ol long han olsem ol i tok em i no wankain bilong wanem sapos ol i kisim long masin em bai dispela taim i sanap olsem 34.04 sekens.

Dispela i min olsem Stone em i nambawan man long ronim dispela resis aninit long 34 sekens mak.

Stone i bin ron wantaim Kuey Diew bilong Australia husat tupela i save trening wantaim.

Diew em i wanpela nambawan junia rana long 800 mita resis tu.

Ren no stopim ol sumatin

Michael Novingu i raitim

MASKI bikpela ren i bin pundaun long Lae long Mande dispela wik, ol pilai bilong ol yunivesiti sumatin long Papua Niugini go het long pilai graun bilong yunivesiti ov Teknoloji (UNITECH) long Taraka.

Minista i lukautim spots, Philemon Embel, i opim dispela ol pilai we olgeta bai pinis long Sande dispela wik.

Embel i tokaut olsem gavman i

luksave long pilai bilong ol sumatin long yunivesiti long kisim ol i kam bung wantaim long luksave long ol yet na tu long luksave olsem ol i gat sans long makim kantri bihain taim.

Em i tok gavman i promis long givim K100, 000 long dispela pilai tasol em i givim K30, 000 long hetman bilong yunivesiti gem.

Arapela K70, 000 bai gavman i givim bihain.

Embel i tok gavman i luksave long yunivesiti gem wanpela bikpela gem

na i no wankain olsem PNG gems.

Em i tok het tok bilong dispela gem; 'Kirapim save aninit long spots', i bikpela samting bilong wanem "yupela ol sumatin i skul long ol koles na yunivesiti long kamapim save bilong yupela i go het long apim ikonomi bilong Papua Niugini."

"Dispela save yu lainim na kisim i no stap long ol klasrum na skul bilong yu, nogat, dispela save i stap tu long ol pilai graun," Embel i tok.

LAE
BISCUIT CO.



WANTOK

S P O T S

LAE
BISCUIT CO.



Isu 1872

Wan wik: Fonde, Julai 1 - 7, 2010.

talk all day
all night for **1t** per min
after the first minute



Call your bemoobile wantoks for as long as you like with our *wantoea wantok* rate. Only **1 toea** per minute after the first minute, anytime!

bemoobile *toktok moa*

Olsem wanem nau?

Nogat bekim long Lam



SORE: Lam i wari long ol Kumuls na ragbi lig long PNG tasol i tok long isap sapos PNGRFL i no stretim hevi na bi long ol.

Andrew Molen i raitim

(PNGSF) long mekim dis pela singaut.

ASTE (Jun 30) em det we PNG Kumuls kosa Adrian Lam i tok em bai risain long dispela wok sapos PNG Rugby Football League (PNGRFL) i no stretim hevi bilong ol.

Long Jun 9 dispela yia, Lam i tok em i no amamas long hevi stap namel long ol ek-sekyutiv bilong PNGRFL long husat tru bai ronim dispela asosiesen.

Em i singaut long ol long stretim dispela hevi bipo long pinis bilong dispela mun, sapos nogat bai em i no inap kisim Kumuls i go long Four Nations resis long mun Ogas.

Lam i kisim sapos bilong PNG Sports Federation na Olympic Committee (PNGSFOC) wantaim PNG Sports Foundation.

Tasol nau yet i nogat wan-pela bekim i kam bek long PNGRFL long toksave sapos ol stretim dispela hevi pinis o nogat.

Dispela toktok i bin stap long kot taim Lam i mekim dispela singaut long ol.

"Mi laikim yupela i wanbel na wanpela tasol i go pas long ronim gem o nogat orait yupela i go long sait na mekim wanpela komiti long ronim opis taim yupela i welim kot i stap." Lam i bin tok.

Em i tok as bilong em i laik risain em bilong wanem em i wok hat long helpim Kumuls i winim ples long go insait long Four Nations na em i no laik bai ol i go na lus wantaim ol bikpela skoa long dispela tonamen.


"Dispela em ol bikpela kanti bilong ragbi lig na sapos yumi no redi gut na go em bai ol i semim yumi wantaim ol *Moa long Pes 25.*"

Johnston's Pharmacies



For First Aid Kits, Red8 Body Bulk Protein Supplements, Thompson Vitamins, Bandages, Strapping Tape, Mouth Guards.

All Sport and First Aid requirements.



P.O.Box 1066 Boroko.
Phone 325 3185. Fax 325 0190.
Email sales@johnstons.com.pg.

Kwatali Envairomental na Sosel Ripot Fes Kwata 2010



www.pnglng.com

Tok igo Pas

Welkam long nambawan o fes Papua Niugini Likwifait Netsurel Ges Projek, Envairomental na Sosel Kwatali Ripot.

Long mun Mas 2010, mipela i tokaut olsem wantaim salim na baim agrimen i stat pinis na ol wok redi i pinis, dispela Projek bai igo het stret. Mipela i kamapim histori long soim gutpela wok mipela i mekim wantaim olgeta gutpela bilip long Projek na gutpela wok ExxonMobil i kamapim long mekim wok olsem opereta wanaim ol lain i wok wantaim mipela. Em gutpela long tokaut wantaim bikpela bilip long Gavman na pipel bilong Papua Niugini olsem dispela projek bai givim bikpela helpim na tu Projek i stap long gutpela posisen tru long givim helpim olsem bikpela Letsurel Ges Prodiusa.

Stat bilong wok bilong Projek em olsem histori, tasol em stat bilong en tasol.

Dispela kain bikpela projek tru mipela i kamapim long PNG em bilong tru-na em i wol klas na yusim bikpela ol teknoloji na menesmen save we i bungim gutpela wok long sait bilong sefti, gutpela luksave long bus, graun, wara na solwara (envairomen) na gutpela wok long sait bilong sosel na ekonomi em gutpela tru. Insait long Papua Niugini, ples bilong kisim ges i stat long bikpela bus tru na wok long kisim em hatwok na em bikpela salens tru bikos i gat planti maunten na tu bikpela bus i stap. Dispela wok i nidim strongpela plening na tu bikpela hatwok long bringim kamaut netsurel ges igo aut long maket long wok long taim na tu long gutpela rot.

Mipela i mekim gutpela Projek wok wantaim ol lain patna o lain mipela i wok wantaim na lukave long Papua Niugini olsem wanpela naispela ples tru na i gat planti gutpela bilas na samting long graun bilong en. Em wanpela nesin o kantri wantaim planti kain kain kalsa na tok-ples na ol pipe i stap klostu wantaim bus, graun, wara na solwara bilong ol. Bikpela gol o as-tingting bilong mipela em long developim na karimaut wok long dispela Projek insait long gutpela rot long was gut na luksautim ol dispela naispela samting we i stap long bus, graun, wara na solwara na long wankain taim tu bringim gutpela mani long sait bilong ekonomi bilong PNG na givim helpim igo long komyuniti insait long wol taim mipela i bringim saplai bilong eneji long helpim askim i kam long wok maket.

Dispela em nambawan ripot long ol narapela ripot we bai kam bihain na i soim wanem rot mipela i laik mekim wok i kamap gut.

Peter Graham
Menesing Dairekta
Esso Highlands Limited

Ken Larson
Projek Eksekutiv
Papua Niugini Likwifait Netsural Ges

Eksekutiv Toktok

Papua Niugini Likwifait Netsurel Ges Projek ("Projek") em bikpela hap bilong wok developmen we i karamapim ges prodaksin we i kam long ol ges fil we i stap nau long Sauten Hailans na Westen Provins bilong Papua Niugini na ol prosesing fasiliti (Hides Ges Kondisining Plen (HGCP), paipain long graun na paipain long solwara long bringim ges igo long likwifaksin eria klostu long kapitol siti bilong PNG, Pot Mosbi. Long dispela hap bai i bringim Likwifait Netsurel Ges (LNG) igo long ol spesel tenka o sip ol i wok long karim igo long ol intanesinol kastoma, nambawan bai goaut long stat bilong yia 2014.

Esso Highlands Limited, wanpela subsidiari kampani bilong ExxonMobil Koporesin, i mekim wok konstraksin na bai wok long Projek makim ol lain ko-vensa - Oil Search Limited (OSL), Independent Pablik Bisnis Koporesin (Papua Niugini Gavman), Santos Limited, Nippon Oil Exploration, Mineral Resource Development Company (makim papagraun long Papua Niugini) na Petromin PNG Holdings Limited.

Sefti, sekuriti, helt, wok long bus, graun, wara na solwara (envairomen), sosel sait long wok bilong Projek em stap aninit long menesmen bilong wanpela ol lain plen we lukim wok i gohet bihainim lo o nesinol lejislesin bilong kantri na tu bihainim lo bilong ol lain long autsait husat i putim mani long projek long sait bilong lukautim bus, graun wara na solwara na ol sosel wok-plen bilong ExxonMobil stendet. Dispela ripot we i karamapim taim stat long mun Janueri-Mas 2010,

em nambawan hap long ol lain ripot long Envairomen na Sosel Kwatali Ripot we bai givim ripot long ol konstraksin wok i kamap na ripot long sefti, sekuriti, helt, bus, graun, wara na solwara (envairomen) na sosel wok kamap na wanem samting long mekim insait long dispela ol wok.

Projek i muv igo insait long wok stret long stat long mun Mas 2010 na nau yet ol i stap long stat bilong en yet insait long dispela 4-pela yia we wok konstraksin wok bai stap long en. Olsem na ol wok long luksave long envairomen na sosel na wok long sekim ol sistem na mekim ol-ripot nau i kirap long stat bilong en tasol.

Planti ol wok insait long projek bai kamap aninit long 6-pela Enjiniaring, Prokumen na Konstaksin (EPC) kontrak we sampela lain husat i save gut na go pas long wok insait long industri olsem kontraktas. Long nau yet wanpela EPC kontrakta (bilong Komo ples-balus) i statim wok bilong em long fil kontraksin pinis. Narapela ol EPC kontraktas i stap pinis long karimaut wok long plening hap bilong wok.

Long go wantaim ol EPC kontrak, konstraksin kontrak em ol i givim pinis long wanpela program bilong stretim ol rot na bris (infrestakta) pastaim long ol bikpela wok konstraksin long kamap insat long Galp provins na Sauten Hailans provins. Wok long wokim rot na bris long antap long insait long dispela program i karamapim sivil wok insait long ol eria long Hides na Kutubu na tu long stretim na wokim ol nupela rot na rot na konstraksin bilong ples bilong trening na kem kontraksin, ekstensin na wok bilong stretim gen ol samting. Narapela kontrak i karamapim ol stat wok long LNG Plent ples na ol eria klostu long en. Wok kontraksin i gohet pinis na nupela nupela dril rig long wokim dril ol i wokim pnis long drilim ol wel bilong projek.

Tebol long narapela pes i soim ol kontrak na wanem ol kontrak wok insait long nambawan kwata bilong 2010.



Esso Highlands Limited, Menesing Dairekta
Peter Graham wantaim Petroleum na Eneji
Minista William Duma

Kwatali Envairomental na Sosel Ripot Fes Kwata 2010

Tebol 1: Ol Kontrakta na wok ol i mekim insait long nambawan kwata long 2010

Wok Kontrak	Kontrak Kampani	Ol Bikpela Wok long nambawan (fes) kwata long 2010
Apstrim Infrastraksa (C1)	Clough Curtain Brothers Joint Venture	Stretim Rot na bris, kem konstraksin na stretim ol OSL kem we i stap pinis long pastaim
	Red Sea Housing	Konstraksin bilong kem. Konstraksin bilong Juni Kem na trening fasiliti
	Telikomunikasin (EPC 1) TransTel Engineering	Karimaut wok long plening
LNG Plent Fes ol Wok (C2)	Curtain Brothers Papua New Guinea Limited	LNG plent sait Bai-pas Rot na stretim Lealea rot. Wokim kamap nupela kem. Putim kamap ol banis long banisim long LNG plent
Ofso Paiplain (EPC2)	Saipem	Mekim olgeta disain na wok enjiniering na long sait bilong baim ol led.
LNG Plent na Marin Fasiliti (EPC3)	Chiyoda na JGC Corporation	Mekim olgeta disain na wok enjiniering na long sait bilong baim ol led
HGCP na Marin Fasiliti (EPC4)	CBI Clough Joint Venture	Mekim olgeta disain na wok enjiniering na long sait bilong baim ol led
Onso Paiplain na Wokim Rot na Bris (EPC5a)	SpieCapag	Mekim olgeta disain na wok enjiniering na long sait bilong baim ol led
Komo Ples-Balus Wok (EPC5b)	McConnell Dowell na Consolidated Contractor Group Offshore	Statim wok long stretim ples na jio-teknikol wok long Komo Ples-balus na Konstraksin bilong Nupela Kem. Klinim na stretim na brukim graun long rot long Hevi kago na samting long wok
Oil Search Limited Associated Ges Developmen	Aker Solutions	Mekim olgeta enjiniering, baim ol samting bilong wok na karimaut wok plen
Dril wok (ol nupela wel na redim long pinsim wok)	Nabors Drilling International Limited	Mekim toktok long sait bilong kontran wantaim ol kontrakta ol i makim long en
Pot Mosbi Konstraksin Trening Fasiliti	Eos	

Projek i ken kamapim bikpela senis long ekonomi bilong Papua Niugini, na sapos ol gutpela samting Projek i bringim kamap em ol i yusim long olgeta hap bilong ekomomi em ol i mas yusim long en, em i ken kamapim gut tru kwaliti long laip bilong ol manmeri na pikinini insait long Papua Niugini. Dispela bai helpim long mekim igo bikpela Gros Domestik Prodak (PNG LNG Economic Impact Study. ACIL Tasman, 2008) na mani kantri i kisim long expot, i kamapim bikpela mani gavman save kisim (revenu), makim royalti peimen igo long ol papagraun, kamapim wok, na projek we i ken kamapim bikpela senis long indastri developmen. Ol papagraun long Projek eria bai kisim helpim i kam long royalti i go stret long ol na tu sosel-na developmen infrastraka bai go bikpela.

Wok bilong kisim ol nupela wokman meri na developmen bilong ol gutpela saveman bilong Papua Niugini long wok em bikpela samting insait long eria bilong Projek Nesinol Konten Plen (NCP). Dispela plen em long bringim namba bilong ol lokal wokman meri igo antap, bringim namba o mak bilong ol nesinol wokmanmeri igo antaim insait long laip-taim bilong dispela Projek na trenim ol long teknikol na bikpela save long wok (profesinol) long wanem wok i stap, wok long bihain na projek na operesin bilong en. Long helpim na karimaut dispela plen, Projek i wokim kamap tupela konstraksin trening fasiliti (ples). Pot Mosbi Konstraksin Trening Fasiliti (POM Tech) na Juni Konstraksin Trening Fasiliti (Juni CTF) i soim invesmen mak olsem K150 milien (US\$60 milien) long trenim mak olsem 850 sumatin long wan wan yia stat long 2010 na narapela 4-pela yia bihain.


Greduet Developmen Program bilong Projek i kisim ol nupela Papua Niugini sumatin husat i greduet long enjiniering, sefti, akauting na edministresin long givim trening long sait bilong ekspiens. Bihain long ol i pinisim gut trening ol dispela sumatin bai kisim wok wantaim ol kontrakas long Projek. Program ya i bin stat long mun Oktoba 2009 taim ol i bin kisim 22-pela sumatin husat i pinisim skul na dispela i gohet long nambawan (fes) kwata wantaim trening long wok yet bilong ol dispela sumatin long Projek Ofis long Brisben.

Ol Kontrakta i ken givim wok long ol manmeri bilong Papua Niugini insait long net-wok bilong Kampani bilong ol Papagraun (Lancos) wantaim luksave igo long ol pipel bilong ol eria we bikpela wok bilong Projek i kamap long en. Projek i bin helpim long kamapim ol Kampani bilong ol Papagraun (Lancos) na i givim sapot igo long ol long helpim long long kisim save long wok bisnis. Ol Projek kontraktas bai helpim tu long strongim wok bilong ol lain husat i makim ol lain i kam long Kampani bilong ol papagraun (Lancos) na givim save long ol long bringim ol guds na sevises long yusim long karimaut ol Projek wok.

Insait long wok bilong baim ol guds na sevises insait long Papua Niugini na kamapim long-taim wok-bung wantaim ol saplaias, Projek i sapotim developmen bilong lokal bisnis ekonomi. Lokal ekonomi i lukim promosin taim em i helpim ol lain saplaias i bungim saplai stendet bilong Projek, i givim trening long ol liklik na midium sais bisnis long develop. Long mun Mas 2010, Projek i opim wanpela Entaprais Senta, we wok bilong en long helpim ol Papua Niugini saplaias, strongim bisnis menesmen save bilong ol na givim ol helpim long painim mani o fainens long ol benk long Papua Niugini.

Wanpela bikpela stekholda meping wok i luksave long moa long 120.000 Projek stekholdas we i karamapim nesinol na provinsal gavman, ol lokal komyuniti, ol papagraun, non-gavman ogenaisesin (NGO), na ol narapela stekholdas husat i gat intares. Bihain long ol wok konsaltesin o toktok igo kam we i kamap long pastaim we i go wantaim wanem bikpela wok long sait bilong bus, graun wara na solwara (envairomen). Dispela i stap insait long 6,000-pes buk, we i bikpela tru winim pastaim ol narapela insait long Papua Niugini. Projek tu i gohet yet long karimaut ol bikpela komunikasin program. Wanpela nupela hap wok long wok-bung wantaim komyuniti i kirap long stat bilong mun Disemba 2009 na i gohet insait long fes kwata. Ol Miting wantaim ol komyuniti grup i lukluk igo insait long Mendi eria bilong Hailans Haiwe (Noten Lojistiks Rut), nambawan lukluk em long rot meintenens o stretim rot na program bilong wokim ol bris. 17-pela miting olgeta i bin kamap insait long dispela kwata wantaim samting olsem 1,600 stekholdas. Moa long en, wanpela tim bilong Len na Komyuniti Afes igo het long toktok wantaim wan wan ol lain na group long dispela toktok bilong kompensasin peimen, muvim ol manmeri igo long narapela ples (risetelmen), ol wok-painimaut pastaim long konstraksin i kamap na ol wanem ol samting bai kamap long eria bilong wok. Projek i developim wanpela Ted Pati Grivens Prosidsa (Third Party Grievance Procedure) wantaim as-tingting bilong en long kisim, givim bekim igo na lukluk igo insait long ol hevi na wari bilong komyuniti. Kamap bilong dispela kain rot em i bikpela samting tru long lukim gutpela wok-bung long kamap na i givim taim long stretim long hevi bihain gutpela rot na stret-pela pasin. Trening i bilong ol Len na Komyuniti Afes wokman meri bin kamap insait long fes kwata long mekim ol i luksave long dispela wok plen. Wok-plen ya (procedure) bai igo aut insait long narapela o neks kwata.

Wanpela gutpela pepa wok, we i ples-klia tru long bihainim i stap pinis we i soim tu gutpela klia sistem bilong mekim kompensasin peimen. Insait long



Komuniti toktok



PNG LNG

www.pnglng.com

dispela fes kwata ol kompensasin peimen i bin go long wok bilong klinim graun long stretim bris, wok painimaut long mekim mak long eria long graun (boundri) we i gat papagraun long en na kliarim ples long wokim rot. Wok bilong muvim ol i go long narapela ples long givim spes long wok i kamap (risetelmen) igo het yet wantaim bikpela as-tingting long givim ol manmeri husat ol i muv na i lusim ol samting bilong ol taim Projek wok i kamap long kamapim bek gutpela sindaun na tu helpim ol yet. Ol risetelmen wok insait long fes kwata igo stret wantaim: muvim ol wan wan haus insait long Komo Ples-balus eria; luksave long ol wan wan haus-lain na plen long muvim ol bihain rot long yusim long Komo Ples Balus; wanem helpim long sait bilong mani igo long ol lain i muv we bihainim ol toktok wantaim HGCP na bungim ol plen bilong Risetelmen Eksin Plan (Resettlement Action Plan), sosio-ekonomik wok painimaut na painimaut long ol rekot bilong Hides Wes Menesmen Eria, Hevi Kago rot, ples bilong kisim karanas na kamap bilong Resetelmen Eksin Plens we i bihain tupela narapela wok na bes-lain sevei bilong ol Hailans Haiwe bris.

Insait long dispela kwata, Projek i pinisim wok long wanpela nambawan Projek Indius-In-Maigresin (PIIM) Stadi. Dispela stadi i luksave long ol kain kain wok, ol draiva, na 'bikpela ples' we ol autsait lain i ken muv igo long en. Em i luksave tu long ol eria we stadi i ken kamap bihain long helpim long sait long menesmen na wanem ol samting long mekim long go wantaim nupela ol senis (mitigesin) long daunim ol hevi na wanem samting i ken kamap taim ol manmeri i muv i kam long hap we i bihainim wok insait long Projek na Papua Niugini.

Wanpela 14-mun sevei o wok-painimaut i wok long kamap nau yet long sait bilong kisim fis long wan wan bilong 4-pela viles o ples arere long LNG Plent sait. As-tingting bilong dispela em long kamapim wanpela bes-lain rekot o data (olsem namba, sais, hevi, na wanem kain ol fis ol i kisim) long save long bikpela wok bilong fiseris bilong wan wan ol femili-haus save kaikai na hamas ol save salim. Infomesin long fiseris bai ol i serim wantaim ol manmeri long ples. Ol Miting i bin kamap pinis long ol ples long toksave gut tru long as-tingting na rot bilong dispela sevei na long kisim tok-orait na sapot long karimaut dispela sevei i kam long ol komyuniti lida. Sampela skul o woksop long luksave long wanem kain ol fis long kisim em kamap pinis.

Wok long lukluk gut na glasim ol Sosel wok i bin kamap long fes kwata long kamapim wanpela bes-lain data o rekot bilong tupela praimeru graun (land) saplai rot. Dispela em long Hailans Haiwe na Sauten lojistiks rut. Wok long sekim na glasim (assessment) long luksave long wanem sosel hevi na wanem sosel wok kamap long ol komyuniti na painim sampela moa menesmen na mitigesin rot we i ken kamap long en. Ol rot long bihain long raitim ol bes-lain kondisen bilong ol samting i stap pinis olsem ol rot, bris nap les long sip igo sua long taim bilong konstraksin i stat pinis. Dispela infomesin bai givim taim long lukluk gen na glasim Projek wok long rot na bris (infrastraksa) i kamapim.

Sefti em nambawan luksave bilong Projek. Komyuniti rot sefti em wanpela bikpela eria na insait long fes kwata olsem na sampela ol rot long bihainim na wanem wok long mekim i stap pinis long helpim trefik menesmen. Insait long dispela em ol wok long putim kamap o rot-sain pastaim long ples wok i kamap long en. Ol i putim tu long posisen bilong trefik kontrola klostu long

ples bilong wok, banis bilong ples we bikpela wok bai kamap long en, ples bilong katim gras arere long rot long soim gut ples, komyuniti edukesin long sait bilong trefik na sefti bilong ol manmeri husat i wokabaut long rot, pasin bilong dring bia na testim ol trak draiva na yusim ol wok-kar long toksave long ol narapela kar i kam.

Ol Komyuniti Helt Program bilong Projek bai kamapim wok insait long gutpela wok-bung namel long wanpela gavman ejensi na wanpela NGO,

em ol i redim o ogenaisim bihainim tupela bikpela tingting long mekim helt wok. Ol dispela em helt promosin/edukesin na rot long stopim ol sik long kamap. Olsem hap wok program bilong ExxonMobil long long givimaut ol moskito net we i gat marasin long en we save stap longpela taim long banisim sik Malaria (Long Lasting Insecticide Treated Bed Net Education na Distribution Program) long pait egensim sik Malaria. Na insait long dispela kwata, Projek i bin wok klostu wantaim Rotarians Against Malaria long ol wok plen long givimaut ol moskito net. Ol Projek sait tu igo insait pojis long dispela Nesinol Malaria Sevelens Program na ol i developim plen nau long strongim wok bilong givim Malaria marasin na helpim igo long ol komyuniti klinik bilong Projek. Moa long 1000 komyuniti i bin kisim tes pinis long sik Malaria aninit long risetelmen program na i kisim marasin sapos ol i gat sik.


Sik TB (Tuberculosis) em wanpela helt eria em lukave i stap long en tu. Olsem na wanpela program bilong banisim na kontrol nau yet i gohet.

Sik nogut we i save kamap long man o meri slip wantaim ol yet na Human Immunodefisiensi Virus (HIV) i stap tu insait long wanpela nesinol seivelens program.


Olsem hap wok long glasim na sekim ol wok i kamap long bus, graun, wara na solwara (environment impact assessment) bilong Projek, ol saveman husat save mekim stadi long samting bilong bipo long graun i karimaut wanpela bikpela stadi tru. Ol i wok klostu wantaim ol komyuniti long luksave long ol eria na ol samting we i stap pas wantaim kalsa na histori bilong pipel na ples ol i stap long en (archaeological and oral traditional sites). Sapos ino gat rot long abrusim, wanpela rot ol i kamapim pinis long menesim ol samting ol i painim na mekim rekot bilong dispela eria ol i painim long en we i stap aninit long atoriti bilong Papua Niugini Gavman Dipatmen bilong Envairomen na Konsevesin (DEC) long muvim. Wok long rausim ol samting long wara em 47-pela tim memba i karimaut wok insait long fes kwata long ol dispela eria em long: HCCP, Kikori Riva Bris na LNG plent sait. Bihain long wok bilong glasim-na-sekim i kamap pinis na ol i mekim rekot bilong ol dispela wok, ol samting ya bai ol i muvim igo long Papua Niugini Musuem na At Galeri. Wok bilong Projek we igo wantaim pasin tumbuna na kalsa na wanem ol i painim long graun bai givim moa rekot na tu infomesin long save gut long pasin tumbuna na kalsa bilong Papua Niugini. Dispela program i givim gutpela sans long ol saintis husat i stap long Papua Niugini long kisim gutpela save o ekpiriens long wok long fil na strongim wok bilong PNG long bihain taim. Moa wok painimaut pastaim long wok konstraksin i kamap em Projek i wok long karimaut insait long fes kwata long lukim olsem wan wan wok sait o eria i stap long stret-pela mak na gutpela wok i kamap long eria na wok senis i go wantaim developmen na menesmen wok mak i luksave long en.

Ol konstraksin wok i ken mekim nois na bringim sampela bagarap long ol eria we i gat ol samting bilong tumbuna i stap long graun na ol dispela i stap insait long ol Projek eria. Sampela moa samting bilong tumbuna long graun ol i painim long taim bilong wok konstraksin em ol i kolim ol "chance finds". Dispela i min olsem ol i wok tasol na painim dispela ol samting. Projek i developim wanpela rot long bihainim na Papua Niugini Musuem na At Galeri i tok-orait pinis long en long menesim o lukautim dispela eria na lukautim ol dispela samting we stap pinis. Nois long ol wok i kamap bai i gat kontrol long en. Insait long fes kwata nogat "sans painim" i bin kamap.

Wok stadi long ol bus na ol enimol na ol diwai i stap insait long en (biodiversity) i bin kamap long fes kwata long luksave long ol samting insait



Esso Highlands Limited, Menesing Dairekta Peter Graham (lephan) na Ron Seddom, siaman bilong Rotarians Against Malaria long stat bilong wok bung long givimaut ol Moskito net program



ExxonMobil



OIL SEARCH LIMITED



Santos



www.pnglng.com

long bus olsem ol bikpela diwai i stap long en, Kumul pisin/ol wail faol pisin/ol bus na narapela samting insait long bus na fores insait long ol eria em "noken go" long en. Wanem ol wok na lo long lukautim dispela ol eria em ol i makim pinis long ples bilong wok. Bihain wok painimaut bilong Envairomental Impekt Stetmen (EIS), narapela moa wok stati i bin kamap. Wanpela long ol dispela stadi i karamapim ol samting insait long wara long Vaihua riva na ol han wara bilong en. Dispela wara i stap klostu long LNG plent sait eria na wara save pundaun long taim bilong ren i pundaun. Narapela stadi em long marin ekoloji long Caution Be insait long eria bilong ofso paipain, marin fasiliti, eria long putim sotpela taim samting bilong wok klostu long ples bilong sip i ron bihainim wara.

Wanpela nambawan hap pepa wok long Baiodaivesiti Strateji o plen i bin kamap long pinis bilong 2009 na karamapim wanpela plen bilong developmen bilong pos-konstraksin baiodaivesiti long mekim tes long ol wok i kamap bihain insait long EIS bilong Projek na save gut long wok-helpim bihain long karimaut wok long go wantaim wanem wok i kamap. Dispela Baiodaivesiti Strateji i stap tu long luksave na tu mekim wok long sait bilong menesmen wok long daunim ol hevi i kamap long samting kamap long projek. Ol i pinisim wok long Baiodaivesiti Strateji (Biodiversity Strategy) insait long fes kwata wantaim ol nambawan wok i stat long kamap. Bikpela wok insait long en, e mol wok ol i kamapim we i go wantaim rimout-sensing long luksave long wok long katim daun ol diwai insait long Projek eria na mining bilong ol bikpela mak long lukautim wok program long fil long glasim ol nupela diwai i gro yusim ol savemen bilong wok foras, husat i gat bikpela save long wok forestry long Papua Niugini.

Long wok bilong lukautim gut bus na fores bilong Papua Niugini, wanpela kwarentain (quarantine) program em nau ol i laik kamapim we i bihainim wanpela intagresin bilong Papua Niugini kwarentain lo na regulesin. Wanem samting i kamap bihain long dispela wok painimaut bai lukim ol i ol mak na plen insait long wanpela bikpela Projek Kwarintain Program. Wok bilong lukluk na sekim ol bus na fores i wok long kamap long ol ples o eria bilong wok. Dispela em long sekim wane mol samting i kamap na sapos ol gras nogut i gro bikpela, ol sik o binatang i stap long en. Ol eria we i gat bikpela poret long ol nupela gras nogut i ken gro bikpela na Notofagus (Northofagus) fores we i ken kisim ol dispela sik na dai isi tasol em luksave i stap long en pinis insait long wok painimaut we i bin kamap long fes kwata.

Long go wantaim bikpela tingting bilong Projek long wok igo het, ol i yusim ol ples-karanas, na 8-pela namel long 9-pela ples bilong kisim karanas em ol i mekim yus long en pinis insait long fes kwata. Long wanpela nupela ples bilong kisim karanas ol i yusim, bikpela wok long sait bilong ekolojikol na wok-painimaut igo insait long tumbuna samting long graun i stap long en na moa wok-painimaut i wok long kamap na Projek i luksave long wanpela gutpela eria we nogat planti toktok bai kamap long en.

Rot long kisim wara na wok stadi long bus, graun na wara i bin kamap pinis long 3-pela riva long glasim na luksave long stap bilong wara na bagarap we i ken kamap. Olgeta wok bilong glasim na sekim i pinis na tokaut olsem mak bilong wara long kisim bai i daunbilo long 10-pesen long wara i ron na dispela bai ino inap givim hevi long ol lain husat i yusim wara long daunbilo na ol samting i stap klostu.

Wok long banisim na daunim hevi long kamap em luksave i stap pinis na wok bai kamap. Dispela bai lukim olsem nogat kar i ken ron igo insait long wara na tu ol pam bilong pamim wara i mass tap antap long plet-fom na dispela ol plet-fom mas stap longwe long wara. Graun bruk traim wara i wasim igo na wara i wasim hap hap graun igo i lukim wanpela kain kontrol i stap pinis na dispela i kamap long fes kwata. Dispela i kamap long rot bilong wara na long rot-wok. Ol long sekim wok i soim olsem

planti ol masin na samting bilong wok i ron orait tasol. Ol kontrakta bai gohet long sekim gut na wokim ol wok meintenens taim hevi i kamap.

Ol sistem bilong menesim o kontrolim ol pipia igo aut long ol kontrakta long stat bilong konstraksin na insait long dispela kwataol kontrakta i mekim gutpela rekot bilong rausim ol pipia igo aut na putim gut pipia na tu long rausim pipia, Planti ol pipia em Projek bai kamap em ino bilong stap long haus o putim long pakej pipia.

Long nau taim projek i stat yet, Projek i tokaut long yusim ol bikpela simen ples long kukim ol pipia na wanem ol bikpela samting ol i yusim long wok. Ol liklik ol pipia em projek i mekim bai ol i putim long wanpela eria em ol kontrolim inap long taim dispela wanem Projek ol i wok long en i pinis. Sampela eria we moa wok i mas kamap long en em luksave i stap pinis na wok long stretim hevi bai kamap.


Projek i mekim gutpela wok tru long sait bilong mak bilong ol pipia wara gut igo aut insait long fes kwata. Olgeta ol pipia wara i lukim ripot igo long Projek na ExxonMobil Developmen Kampani. Wantaim moa long 1.5 milien wok-aua long dispela fes kwata, i bin gat 25-pela liklik pipia wara nogut tasol (wantaim mak olsem 7-lita ol oil kapsait long wara). Dispela ol liklik samting we i kamap em long lokal eria tasol igo long graun long ples bilong wok konstraksin, na ol i klinim gut tru pinis. Ol wok kamap insait long fes kwata i soim olsem i gat rum o spes long moa gutpela wok i ken kamap long stopim o abrusim ol oil i kapsait na gutpela wok tru i bin kamap long stretim na nogat bikpela oil i kapsait igo aut. Bikpela namba bilong ol dispela oil i kapsait em long taim bilong wok. Ol tim long Projek i kisim toksave pinis olsem bikpela wok sekim na meintenens bilong ol masin bilong wok na kar em bikpela samting tru long mekim gutpela wok igo het. Wanpela aweanes trening pepa-wok long sait bilong lukluk long oil kapsait nating (spill) igo pinis long ol kontrakta long stopim ol liklik oil i kapsait. Lukluk ol dispela liklik oil i kapsait na wanem rot long stopim i soim gutpela tingting bilong wok Projek i putim long lukautim gut bus, graun, wara na solwara na gutpela wok konstraksin long operetin.

Grin Haus (ges o win nogut i kamaut) ripot long fes kwatai givim wanpela bes-lain o wok long kamap long glasim bihain.

Insait long dispela fes kwata, Projek wantaim ol kontrak i karimaut wanpela wok long luksave na sekim ol wok long bus, graun na wara i bin kamap. Wok ino bihainim dispela i soim olsem wanpela kontraka protocol o rot long mekim wok em ol ino bihainim o menesmen stret na wok long stretim dispela i mas kamap. Lukluk long wok long fil i soim olsem sapos wanpela wok ino bihainim stretpela rot bai i mas gat wok long stretim mas kamap kwiktam long mekim olsem noken wankain hevi i kamap bihainim. Gutpela wok long lukluk long fil em ripot i stap pinis taim wanpela wok igo insait long banisim birua long kamap i stap wantaim gutpela protokol na rot long bihainim. Dispela verifikesin proses (rot long glasim na sekim gut) i soim olsem 19-pela liklik ol hevi tasol i kamap long sait bilong envairomen, 102 wok long fil long lukluk na sekim i kamap na 10-pela gutpela wok long fil na sekim i bin kamap. Ol wok long stretim ol hevi i kamap pinis na wan wan ol wok we ino bihainim rot na bihainim stret wok long fil long lukluk gut na sesim em bai ol i glasim ol na pasim.

Projek i luksave long wok em i gat long helpim na bungim gro bilong wol long sait bilong askim long eneji. Long wankain taim tu em i wok gut namel long wok bilong sasteinabilitim gro bilong ekonomi, sosel developmen na lukautim na was gut long bus, graun, wara na solwara. Taim Projek i amamas long wanem samting em i kamapim insait long fes kwata, Projek ino laik stap nating na lukluk. Em bai gohet strong long mekim wanem wok em bai mekim na bihainim gutpela tingting em i gat strong tru.

Projek i welkam long wanem tingting o askim i stap insait long dispela Kwatali Ript (Lukim husat long ringim long baksait kava)



Leik Kutubu



Diwai long fores

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.